

# 5 Political Econ  
D. Z. Sheffield. D.D.

耶穌降世一千九百零二年

理財學

光緒二十八年歲次壬寅

上海美華書館鉛版

TA4309  
80

4580/80

序

千金之家一物中分其入之半以償債  
其平居被服飲食器用之費嫁子娶婦  
召賓上壽喪化葬葬之具弔死問疾  
任卹之事娛遊玩好之需自若其故  
曾不少減削以佐其急其償債所  
解之半入不一條理秩次使當其用



又不別治生產以增益所本與此不惟  
家之子弟無慮飢寒之至至而爭  
求自賑也即鄰之人亦且深嘆太  
息其備思其進其少有以相資濟  
矣美之儒有謝衛梅君其吾國之  
一隣人也焉其外交紛紜大增歲幣

時著理財學四卷而索余文為序  
謝君謝君子此將進取少有以資濟  
吾者乎嗟嗟乎鄰之人亦既深嘆  
太息其僑矣家之主計者其如何  
光緒廿有八年二月吳汝綸撰

--	--	--	--	--

自序

理財學何爲而作也、爲使民富而已、民富而國自富矣、然非使之趨於利、乃使之遂其生耳、蓋大地爲養生之源、其能出之利、斯民所得者、尙未及其半、何怪世代各國、多有貧苦之人哉、夫識見未開、晏安自喜、心偏俗敝、政虐官貪、此四者皆致人貧苦之由也、譬人面牆而立、雖美饌嘉穀、羅列於室、不見亦不知、且不得其門而入、亦惟忍受饑餓而已、或有得其門者、而淺嘗輒止、玩愒自安、則僅免啼飢、終難果服、況人心之所好、易趨於邪、相習成風、遂有積重難反之勢、其效無他、窮困而已矣、若夫國律官長、乃庇佑人民、各求養生之路者也、倘國律不善、官長貪污、是杜人民養生之門、使無暢遂之望、迫人於貧困之地者、莫此爲甚矣、講理財學者、非講論農工商賈之事、而其中之損益、必講明之、亦非講論人心風俗之事、而有妨於得地利、生貲財者、必明辨之、亦非講論國家行政定律之事、而於保護人民、引導人民、使得自由之樂、生利之門者、必指陳之、至於所講生財之道、必準乎天理、或有背乎天理、妄求貲財者、必至損人益己、乃理財學之罪人也、蓋此學以仁義爲本、非爲一人之益、乃萬

人之益、人以仁義之心、行工商之事、必能相助爲理、萬人均得其益也、倘飾詐行私、但求利己、必至羣相效尤、風俗頹敗、通國皆將窮乏矣、雖工商之事、有角逐之條、而各國各族、皆當連絡輔助、蓋大地所出之利愈多、而人之用度日裕也、此書之作、非譯諸西文、亦非獨出己見、乃多取汪克氏美國人曾爲馬邦工務局之院長理財學之名師也之意、揆諸中國時勢、與西席諸葛巨川先生參互考訂、輯爲成書、付之剞劂、以課院中生徒、甚願諸生熟讀深思、或能推廣此書之意、按中國之境況、擴而充之、實爲余之厚望也、通州潞河書院院長子榮謝衛樓序於京都之勤慎軒、

理財學目錄

理財學大旨

卷一 論生財

第一章論地與地產

一 貲財之生

二 生財之由

三 取地利之定理

四 地利爲資財之原

五 田地復興之理

第二章論人工

六 苗夷不論人工

七 牧牲之人工

八 耕種之人工

九 生貲財之多寡

十 分工之益

十一 人工有生利不生利之分

第三章論貲本由何而生如何而用

十二 資本與資財之別

十三 資本之原

十四資本由政教而增

十五器物皆爲資本

十六實爲資本者

卷二 論易財

第一章論交易於生資財之關係

一交易之由

二價值之分

三諸物之值因其益人

四諸物之價值不盡在人工

五物價貴賤之故

六少出之物其價不同

七多出之物其價不同

八人之逐利與物價相關

九物因有益於人而定價

十在市之物價由何而定

十一貿易之市

十二存積之物其價增減不同

十三物有素定之價

十四交易宜用誠實

十五交易須有才智

第二章論諸國互相交易

十六交易因地勢而殊

十七交易因國勢而殊

十八各國互易之理

十九各國交易之大旨

第三章論錢幣與錢幣之值

二十錢幣爲交易之準

二一當以何物爲交易之準

二二宜以金銀爲錢幣

二三較金銀爲錢幣之益

二四錢幣當以國法維持

二五金銀之錢幣究難持平

二六錢幣惟當國家鑄造

二七金銀流通諸國之理

二八國中錢幣當足交易之用

二九錢幣有勵人之益

三十國錢幣不同必於交易有損

第四章論金銀錢票於貿易之損益

三一出票宜善其用

三二國出鈔票當先籌備金銀

三三國出鈔票不可指產作抵

三四銀店出票須有國律主治

三五銀店出票當合乎正用

三六銀票難通行於他國

第五章論所出之物與所散之物何涉

三七交易愈廣所散之物愈難料  
三八貿易盛衰之故

三九貿易之盛衰與人所用之物相關

卷三 論分財

第一章論地租

一地租之所出  
二運物之費與地租相關

三地價與租價之連屬  
四物價與租價無關

五地租多寡非盡按乎實理  
六草地之租價

七水利地之租價  
八房基地之租價

九礦地之租價

第二章論利息

十利息之大旨  
十一利息重之故

十二國家定利息之制損益參半  
十三利息重輕之故

第三章論總辦

十四總辦之事功

十五總辦之利益

十六不用總辦之損益

第四章論工價

十七工價亦在分利之數

十八工價有名實之不同

十九工價有多寡之不同

二十工價因教化而增

二十一工價多寡之故

二十二交易之通塞與工價相關

二三國家當維持工價

第五章論賦稅

二四國家取民賦稅之故

二五取民賦稅當酌其宜

二六稅有正副之分

二七征入口稅當酌其宜

卷四 論用財

第一章論用財有關於民生

一人宜善用其財

二器物堅實之益

三國民納稅之益

四人當用財以成善舉

五敬神亦須用財

按理財學之理見之於事者推論數端

一國家定利息之制有損益之不同 二合夥之事

三拯濟貧民

四同行成會

五徵租歸公之誤

六銀店之益

理財學大旨

夫理財之學、所關者卽生財、易財、分財、用財也。此學乃專論其理。若欲究其有何損益、乃在講是非學者、或考論國政者、詳加推測矣。

按理財之學、非導人好財也。有摘是學之弊者、稱之爲財利聖經。然譏之過矣。試思人有宜求之事、比求財之關係尤甚者、如求美譽於人、求恩赦於主是也。至於求財之關係、亦非淺鮮矣。蓋人生周旋世故、悉本乎生財用財。故此學非導人好財過於諸務、乃訓人當用何善術以生財用財、非論其究竟如何也。或欲豐厚家資、接濟鄰友、村邑之助、都國之需、廣傳聖道、增益身家、凡此皆所弗論。且此學非啟人貪利之心、乃揭明人之生財、非在乎奪人之利、乃在乎農工勤謹、商賈公平、又在乎國政民俗之敦厚也。人當未講此學之先、多以交易爲專利之私、非同利之公。生之於此、必傷之於彼。此之益、卽彼之損也。由是多行巧詐以增其利。故諸國多有阻抑交易之條、且因交易之故、互起分爭、而衆之資財、不但未能增、且大爲減也。凡物於人交易有利者、皆爲資財。夫人必有其需用之物、方能身體飽煖、心志安舒、

此諸物人能互易、以羨補不足、卽謂之資財矣。如以金銀爲資財、因能以之易諸物、以田舍爲資財、因能以之易金銀也。若在教化未開之先、僻壤遐陬、不知耕種、只依其地以相採獵、此地雖有益於人、然不能指地歸之於己、則不能定價交易、故苗夷所佔之地、不能爲資財、倘漸受薰陶、皆知伐木墾田、多獲嘉禾、而曩日地之無可議價者、今已變爲有價、曩日不可謂爲資財者、今已可謂資財矣。夫物有不可名爲資財、因人力而成爲資財者、如水之爲物也、天降甘霖、地皆含潤、河湧濁流、土變膏腴、水之益人雖大、多則不足貴、未可目爲資財、然在缺水之處、一人掘井及泉、轉售他人、則變爲資財矣。又如山澗之水、用之不盡、則不能謂爲資財、人若開通溝渠、引水入城、爲衆所用、或以鐵筭埋地、引水入於各家、均此水也、在山澗非資財、入城市乃資財矣。因人費力已多、用銀無算、方得此水、售之於各家、而能大獲其利也。○若問人之身力技巧心才、宜謂爲資財否、講理財學者、所論不同、有言可謂資財者、因其皆有其價、人出資覓人作工、以其所出之資、爲身力之價、若覓技巧者、以成常人所不能成之事、所出之重價、乃償其巧、若請才高之人、冀其能成大舉、所出非常之價、

乃償其非常之才、如上所論、似當以身力技巧心才爲資財、然亦有謂不可爲資財者、因不能與人交易、究不得謂爲資財、當謂爲生資財之本、○若究問何物當謂爲資財、必問國政民俗如何、蓋有此國人謂爲資財者、彼國人則不然、如役人爲奴之國、則爲奴之男女有價、皆能易金銀、於他國則否、在西喀西阿國、美女可爲資財、因其父能定價售之、然他國之美女、不可謂爲資財、因國政不許其售也、

請言何物於人大有利益、卻不能謂爲資財、且揭明其故、○兵勇爲國戰征、多歷艱險、或隕生命、其身力心勇、可爲資財否、○父母撫育子女、所用身心之力、可爲資財否、○醫家明醫病之理、與用藥之當、可爲資財否、○金銀銅鐵鉛煤等物、尙韁於地、可爲資財否、○人之身力技巧心才、究能與人交易否、

凡事之有關於生財易財分財用財、咸宜考究、如勤惰奢儉、忠誠巧詐、悉與生財用財大有關係、有以人爲佃奴之國、驅役耕耘、有鬻人爲奴之國、市同牲畜、有分人等級之國、永判尊卑、有君主之國、全國之輿圖悉屬於君、有民主之國、各戶之田疇皆屬於己、以上諸事、皆關乎生財用財也、又如耕耘、收割、紡織、陶冶、各等機器、以及輪

車輪船能運物至遠近售貨之市皆與生財用財有關此講理財學者所宜考究而闡發其生財易財分財用財之理也

<sup>五</sup>按理財之學所定之理與各國皆有關涉或謂各國教化迥不相侔風土人情亦難一致理財學所定之理似難通行萬國不可謂與此國合宜者即必與諸國合宜也以上所論似是而實非夫論理財學之理者固宜發明諸國相異之情狀如國爲民主人多材藝而國政民風純樸敦厚易畫生財之策獲利實多若國爲霸主政多苛暴羣黎百姓拘泥庸愚素無經營之術聚利殊難論理財學者當明析其民風國政因時勢以制其宜究不可謂此國理財學之理與彼國理財學之理不符也蓋諸國之生財各有阻滯之端誠能剔除無遺則理財學所論生財易財分財用財之理必能通行於天下各國按此理求財亦必大有利益也

<sup>六</sup>按理財之學所究論之大意可分四端一究論生財之緣由與生財之要術二究論諸物互相交易之理三究論生成之物如何分布於人間四究論如何用生成之物並揭明用之之術與異日生財何涉

理財學卷之一 論生財

第一章 論地與地產

資財之生○凡人用力用心、令何物於交易有利、或以何物易人工、與償人工所成之物、皆所謂生財也、日耳曼有講理財學之師、將交易有利之物、分列如左、一、因時之利、一、因地之利、一、因形之利、如北方冬令、冰凝江河、斯時之冰、無可交易、何足言之利、若藏至盛夏、則交易有利、可得夏時之價矣、此乃因時之利也、菓實之價、冬昂於夏、因其物易腐、而難久存、冬時價昂、亦因時之利也、或將北方堅冰、當盛夏時、運至赤道之城邑、均此冰也、一轉移間、而其價倍蓰、因冰在赤道、本不易得、此因地之利也、如煤聚於山、天然生成、在本處其價無多、僅抵挖掘之費、運之愈遠、其價愈昂、又如中華之茶葉、在產茶之區、其價甚廉、若運至泰西諸國、則價增數倍、此皆因地之利也、或用木石銅鐵造成奇巧之物、購斯等物料、價尙無多、及造製成形、價乃多耳、此乃因形之利也、不論何物、若變易其體、以增交易之價、均可謂因形之利、試思大木成林、價值幾何、及至伐以斧斤、施以巧藝、成爲牀壁門窗、車船几案等物、則價頓

增皆所謂因形之利也。亦有物價之多，在乎體質者，如金銀珠玉，其質之貴，在人視爲珍寶，亦在其物難獲，究之物價之低昂，多不在原體，而在人工。卽如以銀一兩購鐵一塊，作成馬掌，則值銀二兩。若施巧術，變鐵爲鋼，以成刀劍，則值銀百兩。若製成鐘表之法條，則值銀五百兩。可知其價之低昂，少在本物之貴賤，而多在人用力施巧，以成其形也。

於因時因地因形之外，尙有何物於交易有利

生財之由。○或謂地利獨爲資財之本，蓋資財無不由於地產也。或藉人工，或藉資本，未能於地利有所增。果如所言，是地利誠爲資財之大原，然地能產利人之物，若不助以人力，其物與未生成者等，或生成而未取出，則不可謂爲資財，只爲資財之原。所以人工資本與地利並重，不可謂地利獨生資財，而人工資本不生資財也。取地利之定理。○如農夫之耕耘灌溉，不論何地所取之利，必有定限。若逾茲定限，再加人工資本，則地利不償工本矣。譬如二人治田百畝，農器未精，牲畜無助，則難盡取百畝所能產之利，或只得糧十石耳。以此糧贍養二人，僅敷一年之用。誠以田

多人少、力有不足也。若增至五人、並用精利之農器、又有牲畜之助、則所取之地利、較二人或增十倍、夫五人增利十倍、則共得糧百石、每人分糧二十石、先則每人分糧五石、只餬其口、此則不僅餬口、且每歲餘糧十五石、如此歷歲積有贏餘矣、若再加至十人、而所取之糧只一百五十石、每人得糧十五石、是十人與五人較、每人反少得五石、無他、因所加之工本、已過每人取利之定限也、然使農器益精、培養愈勤、則必滋生蕃盛、收穫實多、十人所取之地利、或較五人多增三倍、若取糧三百石、每人獲糧三十石、歷歲於養生之外、可餘二十五石、或加工至二十、取糧四百石、每人只得二十石、與五人所得無殊、若加工至四十、取糧六百石、每人只得十五石、是較五人猶少五石也。

問按以上之理、國民當有如何景況、始能易增資本、○國中有如何景況、則不能易增資本、○人掘金銀銅鐵之礦、其人工器具資本當何如、始可盡得地利、

地利爲資財之原、○夫人之食用諸物、悉由地產而來、故地利可爲資財之原、按陸地初本爲石、後因代遠年湮、屢經風霜之剝蝕、寒暑之摧殘、遂漸腐而爲土、雖肥磽

不一、然得日暄雨潤、咸能生長植物、植物能養動物、人賴植物動物以生、地中又韞五金、益人無窮也。

問金類之物、於人之益如何、○水之益如何、風之益如何、火之益如何、電氣於人之益如何、地利至後日有用盡之憂否、

田<sup>五</sup>地復興之理○或謂地之生利有限、若越茲限、卽無利可生、如庫貯金銀、取出一錠、庫中卽少此一錠也、然此論未確、夫物產固皆出於地、若屢年耕種、不糞其田、則地脈必瘠、而所出之利、不敵所用之工、究不可與庫中之金銀相比也、蓋自地所出之物、終必復歸於地、毫釐不爽、若金銀自庫而出、終必復歸於庫、而庫中之金銀、終不能虧短其數也、顧大地之物、雖無所失、然多有益人之物、一變其形、則頓失其益、如宮室壯麗、固於居者有益、若灰燼之餘、瓦石糜爛、雖基址未燬、已成無用之物、人種田地、必屢年布糞、以補其不足、其利始取之不盡也、有人推廣斯意、謂當禁諸國之通商、以防諸物運於遠方、使出此物之地、漸失其利、宜在相近之區、交易貨物、庶何地所出之利、不久仍歸何地、以補其缺、○上言地土皆石所變、而石變土、古如何、

今亦如何、此卽復興地利之原也、且因風吹浪湧、動植諸物、生長朽死、土地卽乘時復興、有土地爲易朽之石所成者、每年地中所出之利、爲朽石所補、雖不加糞、而地利亦不減、更有土地因每年得山水之潤、亦不減其利也、

問中國今代之地利、與上古之地利如何、

## 第二章 論人工

苗夷不論人工○試觀苗夷之保命衛生、與禽獸不分軒輊、其所恃以生者、皆地自然之利、無所謂之人工也、居則叢林地窟、不知爲棟宇以避風霜也、食則菜菓與禽獸之肉、不知調和五味也、素無蓄積、無所謂資本、雖恃地利以生、卻不知多取之法、所得者只萬分之一耳、所以苗夷數千、必據大段田地、方免凍餒之虞、倘化其心志、教之耕種田疇、卽生齒增數百倍、其地所出之利、仍足養其生也、奈此輩賦性冥頑、朝不謀夕、不知若何取地之利、但窮困以延歲月、非與人戰、卽與獸爭、理財學之理、於斯人無與、蓋彼無所謂人工、亦無所謂資財也、

牧牲之人工○夫人之取地利者、其資財之增、自牧牲始、此等人度日、不徒恃地自

# 理財學

然之利。初以行獵爲生。嗣將數類野獸。如馬牛羊之類。設法調理。以備任使。渴則掘井以飲之。飢則擇草以牧之。且當夏季。蓄草禦冬。使之不至瘠瘦病死。又爲之築廐立圈。以防獸噬天災之害。至孕育之時。則加意保養。使之滋生蕃盛。先時諸獸之未爲資財者。今恃人工。則變爲資財矣。夫同是取地之利。先未如此。因靈明未啟。今能如此。因知識已開也。是知人之心才。實爲用人工取地利之大原。以牧牲與行獵者較。人民必能蕃庶。因多取地利。自能多養人也。譬如一家五人。以行獵爲生。必據地百頃。方可度日。若改獵爲牧。則有地十頃。卽足謀生。蓋先時若獲一野牛。只食之而已。今蓄一牛。每歲旣生牛犢。又食牛乳。先時若捕一野羊。亦只食之而已。今蓄一羊。則每歲旣取羊毛。又得羊羔。及牛羊成羣。食用日增。而資財亦日增矣。且以牧者與獵者較。不但多取地利。而所取之地利。尤爲穩洽。蓋獨恃地自然之利。或遇水旱不均。寒暑失時。則地不出利。人卽難免飢寒。今旣多有牲畜。雖凶年仍能存活也。

蒙古世代牧牲爲業。其故何在。○中國因何不然。

耕種之人工。○人之耕種田疇者。其事又高於牧牲也。蓋牧牲只能取地面之利。若

精用耒耜鋤耨、使地脈鬆活、播種五穀、則能得地中之利、以十畝之田耕種、與以百畝之田牧畜、所取之利或同、故耕種田疇、雖人數加增、仍能得其資養、前則居於帳幕、隨時遷移、尋覓水草、今則居有定所、建築房屋、於養牲之外、漸生資財、夫資財愈增、則境地愈美、陋室草廬、漸變爲高樓華閣、蓬戶甕牖、忽易爲淨几明窗、而且屋室之陳設、牆壁之裝飾、以及所衣所食、無不精巧華麗也、若將有教化之農夫、與無教化之苗長、衡其食用、苗長反不及農夫、可知人有教化、雖卑亦尊、人無教化、雖尊猶卑也、

生資財之多寡○夫人以所能出之工而生資財、各有不同者、其故非一、一、人自有生以來、其精力之得於先天者懸殊、不但城鄉各異、卽同族亦有攸分、如中國之人、力大於日本、印度、英國之人、力又大於中國、且人不但身力不同、其工作以生資財亦各異、如人頗強健、若無習練之巧藝、心鈍手拙、雖能多出身力、而少得工價、則少得地利、又如人身力有限、然有習練之巧藝、心靈手敏、能多得工價、卽多得地利、二、人以食物養生、與其所出之工、大有關係、蓋人之腸胃、如火輪汽機之火爐水釜、催

動汽機、使成益人之工、是火爐水釜、皆賴之爲出力之原也、人欲出其身力、以成有益之事、皆賴腸胃爲出力之本、爐加煤火、則汽機之力必增、人加食物、則身體之力愈大、譬如汽機一日只用煤五十斤、其所生之力、雖能令輪旋轉、然只能勝此汽機之阻力、並無餘力、若增煤至百斤、則有餘力、可成益人之工、增至一百五十斤、其力或多於百斤之力三四倍、增至二百斤、其力或多於百斤之力五六倍、所增之力、恒倍多於所增之煤也、蓋先少用煤、其力只能催茲汽具、而今所加之力、竟增與人有益之工也、若推此理、至於人身、人若一日只食一斤、則所生之精力、只能補其身之所耗、並無餘力工作、若增至斤半、則微增精力、即有能出之工、增至二斤、其力或三倍於斤半、增至二斤半、其力或多於斤半之五六倍、可知人必足食、方能多出身力、以成有益之工、然而欲增大力、雖在增煤增食、而所增者卻有定限、倘煤逾定限、則汽機必壞、食逾定限、則人身受損、非徒無益、而又害之也、總之、人欲得足力、必令足食、食若不足、則所能出之力、必有窒礙矣、嘗見有人食雖不足、而仍強其工作、久則暗傷、或體弱而多疾、或年壯而力衰、又嘗見人用牲畜、豢養不足、而強使之任重致

遠以致瘠病衰殘終成無用之牲人如此苦己身與牲畜之身皆於取地利大有所損其所以如此者或因窮困窘迫或因心才隘狹但貪目前之利不顧後日之損也  
三、人之居室於身力大有關係上言人賴食物以養身蓋食物入胃方能消化遞入大小腸以取其精液精液入血管流通全體必由肺經過將炭氣呼出不使於身有損而於身有益之養氣自外吸入於肺傳過薄膜滋榮其血令全身增其精力可知人之居室當有清爽之氣使其血多得潤澤而身之精力始足人於呼吸之際若缺當用之養氣雖足食而血不得滋榮身亦不得養育人之精力必微且在矮小房屋少得日光多有毒氣暗伏外又有多類微渺之毒種滋生於人身大有損害於是有熱症喉痺痘疹霍亂瘟疫各種病症人常居缺養氣有毒氣之房屋當時雖不覺有損而身力必受其害若移居高大房屋足有日光並來清氣則全身之精力頓增其所能出之人工亦必有增益若將國與國較其得充足之食物與敞闊之房屋者惟美國人較優故其出力工作亦較優若將美國人與印度人較美國一人之身力足敵印度三四人之身力則飲食居處之所關豈淺鮮哉在歐洲之豐富者雖居廣廈

高樓、而羣黎百姓、仍多居狹隘房屋、少得日光清氣、或多人擁擠一處、衣服食物、房屋器皿、均不潔淨、其狀如斯、不免身體懦弱、疾病易生、孩提若生長於此、必少有精力、或多夭亡、縱令成人、亦必血脈不足、少能出力以成益人之工也、西國有諺語云、窮人之害在乎窮、乃謂其爲窮所困、無術可施、只得代代苟延殘喘、無由脫離苦況也、理財學之學、所以大益於人者、乃在揭明此等窮困之由、且發明如何救人脫離此苦、令人飲食足、房屋好、常得天氣之養育也、四、人之心才、與出人力取地利、大有關係、茲所言之心才、乃指人之心思敏捷、觸類旁通、記憶清晰、易於推測事理、不但大眾之心才迥異、卽各族之心才亦殊、古希利尼族人之心才、較他族人覺乎尙已、所以西方諸國、歷代習其文學技藝也、多有苗族心才遲鈍、不易啟其聰穎、去其愚魯、若推斯意、有心才者比無心才者多出有益之工、其故不一也、一、有心才者任習何工、較乏心才者省時日一二倍、或三四倍、二、有心才者著手工作、少煩師長之指示、因其心靈善變、一經提撕、卽知如何而作、甚至素日未作之工、因物窮理、亦能作成、三、有心才者能省物料、蓋人製造諸物、所用之料、其價有與人工相等者、有比人

工加數倍、或十百倍者、若令拙工爲之、其所費之料、或多於己之工價、可知心才之靈鈍有差、其物料之費省、卽大相懸殊矣。<sup>四</sup>有心才者善用各種省人工之機器、茲不論各種機器於人工之益、只言何人能用機器而獲大利也。夫機器乃巧思者創成、用之者當究斯物如何創製、且知其中運行之理、如是用之、方能妥協無虞、或有時出弊、亦知如何修理、嘗見拙工使用機器、不久卽壞、徒費原購之價、夫用機器、不但人與人巧拙懸殊、卽族與族亦靈鈍迥異、今雖多有巧妙紡織之機器、省人工千萬倍、然在多國仍有用人工紡織者、人雖早知用槓桿、滑車、斜面、可省人力、而增人功、然多人不知如何使用、仍費大力以成此易成之事、先年在美國非立德非亞城、設立賽珍會、選人斷定諸等機器省人工之實益、此諸人言此世省工益人之機器、一半成爲廢物、因付於拙工、不知如何使用也、能多作省人工之機器者、美國爲首、英國次之、而歐洲諸國又次之、亞洲諸國又次之、能使用機器而得其益者、又美國爲首、因人耳濡目染、多知機器之用、雖未曾習練之機器、而因此識彼、自能使用無誤、今美國女工、多用縫衣之機器、以增其功、士商寫字、慣用印字之機器、以省其力、

其他省工增益之機器未可盡數也。美國數年前有業履之大作坊用千餘人，又用各種機器，此千餘人齊心罷工，欲增工價，主人遂另招生手，派掌各種機器，五月後查驗之，則言雖易生手，卻無一受損者。若在他國將此等機器付於未曾習練之人，五月後或成廢鐵矣。可知人有心才，於其工作利益大有關係。五、人心若多暢遂，則能多出力，以成益人之工。嘗見人心或有憂慮，精神不振，工作有虧，亦有因憂慮日甚，疾病旋生，不能出力工作。古今各國有購人爲奴者，而奴役之工較自主者成功必少。蓋奴役常處苦況，知作工無益於己，雖撻以鞭箠，仍難望其振作。若自主者知出力有益於己，卽不憚辛勤，以增所求之利。在西國有大製造局，或用數百千工，其主人另啟屋宇，陳設各等奇異之玩物，雅俗共賞之書籍，令工人暇時藉以淑性陶情，使其心志暢遂，精神振毅，可增其工作之力也。六、人冀得厚利，則必勤其工作，嘗見人爲他人工作，一日只得一日之定價，不易使加勤奮，蓋所冀之利無可增，出力多少均於身家無所增益也。若不論每日之定價，但按其工作得利之多寡以給之，其所出之力必增。譬農人以耕鑿爲生，田疇屋宇器具牲畜皆爲己物，藉之以備養

身家之用、若多出一刻之工、卽多增其所求之利、將必披星戴月、勤於諸務、耕耘不留餘力、灌溉必用精心、牲畜不令其瘠弱、期有力以助工、器具不令其損傷、冀永存而無敝、如此用心、蓋因有增益其利之望、若傭工只爲日價、而望其專心於諸務也得乎、七、國政民風於人之工作大有關係、徧考諸國歷代史書、凡有惠政仁風之國、吏多循良、律皆平善、傭工者所得之工價、足爲仰事俯畜之資、故皆出力工作、家道必漸寬裕、少有困窮之况、若國政苛暴、民風邪惡、國中必多詭詐欺奪之端、衆卽出力於諸等工作、而屢遇阻撓、亦必始勤終惰、只求餬口而已、雖膏腴之田、易得厚利、因利非己有、誰復勞其心力乎、可卽哀爾蘭之島民證之、此島屬於英國、而島上之田畝、多歸英國富家、業主將其田租於哀爾蘭人、因租價甚重、雖竭力耕作、終無餘資、遂不思辛勤、苟延歲月而已、其人如此怠惰、豈其本性然乎、或言哀耳蘭人戲玩則精力有餘、工作則精力不振、誠以戲玩之樂在己、無人能奪、工作之利歸人、於己無補也、然數十年來、多有哀耳蘭人移居美國、以傭工度日、因工價優於本島、每歲於養家之外、尙有贏餘、居不數年、遂置買田疇、辛勤工作、以獲地利、前之一貧如洗

者。今在美國多立大業焉。非猶是哀耳蘭人乎。在本島則怠惰如彼。在美國則殷勤如此者何也。統觀以上七端。卽知於諸國人工工作。大有關係。若將英國之人工與印度之人工相較。不啻天淵。今在印度有英人開築鐵路。印度人比英人工賤十倍。然築鐵路於印度。其費用反多於英國者。因印度十工。不敵英國一工也。若將英國織布局與俄國織布局較。英國一人所掌織布之機器。多於俄國人二三倍。有人將英人與法人較。言英國三人工作。可敵法國之五人也。

問中國人之食物。於其出力成工如何。○中國豢養牲畜。於助人之工如何。○中國人之宅院寢室。於所出之人力何關。○印度國有何風俗。於民殷勤工作有何阻礙。○中國婦女纏足。於人工地利有何阻礙。○蒙童早娶。於人工地利有何阻礙。○按中國之風。一家數世同居。西國之風。子女成人各爨。此中西之國風。於人工地利有何關係。

分工之益。○嘗思苗夷欲作何工。必親身自爲。如欲居房屋。則親建之。欲用弓箭。則親造之。欲食獸魚。則親獵之。捕之。不知通功易事也。然苗人雖不分工作。而男女則

各有所司、女不得如男之逐獸取魚、惟主持中饋、撫育子女、因男女之力不同也、苗人若得化導、漸知牧牲耕田、築室通商、則必各分工藝、或專爲農、或專爲工、或專爲商賈、不至以一人之身、而兼百工之事、總之人受誨日深、所成益人之工愈衆、而所習益人之藝亦愈多、人分工作、則能增所取之利、其故不一、一、省習練之工、一人若司數藝、則兼營並驚、精者必少、西諺有之曰、人若多能、卽一無所能、人任習何工、莫不損器而費材、若專司一藝、則成功必速、而損器費材亦少、二、人專習何工、則熟能生巧、而所成之事愈多、三、人於諸工、各有所長、若專爲所長、旣得心應手、且免更役之勞、若兼數藝、不移時卽遷地備材、更事易器、於所得之利、多有所虧、四、人專用工於何藝、不第愈練愈精、且能悟出省工增益之機器、西國有如許巧妙機器、多因熟能生巧者所造成、五、工有難易精粗之別、旣分工作、則婦孺與巧匠、各按其才力心思、可得合宜之工作、六、有須夥作之工、擇一匠首監工、則所作之工多、而得利厚、人於衆藝、各有利鈍巧拙之不同、拙鈍之工、若無人指誨催迫、其所成之功必少、而巧利之工、若使一手而兼衆藝、則難盡其巧利之益、惟令多人夥作、擇一巧利者爲首、

則眾匠受其指誨得其催迫所作之工必增今西國之工作愈分藝者愈夥作甚至數千百人悉聽一人之調遣此人所專司者乃何材宜選何器宜用何人宜作何工也於是夥作之工較各人散作之工愈多而所得之利愈大

問農人若合夥工作其損益如何○何類之工夥作有益○農人如何分其工業

○木工如何分其工業○鐵工如何分其工業○請述所知中國人之技藝

人工有生利不生利之分○蓋生利之工即人所出之工爲生利之本顧有此工則能生此利無此工則不能生此利也如人之製造車船載人裝貨即能得其運價不然則此利何由而得又如建造作坊製成貨物即能得其售價不然則此利亦歸烏有又如天地之間水之功用甚大但其蘊蓄於地其利無由而得若掘地及泉人之用水無窮而水之利亦無窮焉所謂不生利之工者與生利之事漫無關係如國家建宮殿修壇廟築城隍等類皆非生利之本也又如豐富之家蓋造華屋陳列玩好以及酒食徵逐車馬驅馳所以遊目騁懷致足快樂倘無另外生利之本不將坐喫山空日漸困窮乎夫所謂不生利之工者非謂與人無益究非生利之源也

請將生利之工推說數端○將不生利之工推說數端

第三章 論資本由何而生如何而用

資本與資財之別○上章已論明地利人工於生資財有何關係此章乃論資本於生資財何關但資本與資財有何分別宜先辨明之前言凡物於交易有利者則謂之資財資本乃於交易有利固當列於資財中矣然實不同如人積蓄何物用以度日不復以之生可食可用之物斯可謂之資財不可謂之資本若將所積蓄者用以滋生益人之物卽謂之資本矣譬如父遺子業留銀萬兩其子若日用此銀不思藉以獲利此銀只可謂爲資財不可謂爲資本因未用以滋生利息也若將此銀作何生理每歲得利銀數百兩或數千兩卽可謂之資本矣有人論未墾之田爲資本亦有論天氣和煖雨澤停勻爲資本者然如此推廣不符於理財學之理蓋多有事務與生財相係者不當目爲資本如天朗氣清雨潤日暄天降甘露地出醴泉以及長江大海仁政休風皆於生資財大有干係要不當謂爲資本只可謂生資財之藉端耳

資本之原○欲發明資本之原由，可以苗夷爲喻。設有一族苗人，遵海濱而處，專恃捕魚爲生。每日多捕則多食，少捕則少食。室如懸磬，初無隔宿羹也。若值風雪交加，魚不上游，則餬口無資，枵腹自嘆而已。倘茲苗人中有心才超衆者出，匠心獨運，取樹皮製艇以捕魚，其獲必多。然造艇必有所食，於是未造之先，當比平日多捕魚以儲之。日日製爲魚乾，迨蓄儲足用，則攜入叢林，日食此魚以製艇。既成，即乘之以捕魚。所得之魚，較無艇者或多數倍。當其無艇之時，捕魚與他人無異。今既有艇，則可謂有資本矣。其資本由何而生，豈非生自魚乾乎？其乾魚之資本，又變爲小艇之資本矣。蓋此艇有欲用之者，則可議價。苗人雖無銀錢，多有願以人工易此小艇者。因誰有此艇，即能多獲利也。其後斯人所行者，約有數條：在己擇而行之耳。一、可將此艇租於人，藉租價以度日，或與全家息偃游娛，或與鄰朋往來酬酢。二、可用此艇勤慎捕魚，日積月累，因有餘資，則能易人工，或易有用之物，能僱人爲己以木建房，較鄰居之茅屋峻而且宏，或僱人作陳設之几案，或僱人隨侍兒童，治備飲饌，較無艇之漁翁固儼然富家也。三、可將此艇轉售於人，仍造新艇出售，由是愈造愈精，亦愈

造愈速、而獲利必愈厚、或以銷售日廣、一人之力不足、則傭工製造、迨售賣既多、資本漸厚、可爲後日增添藝業之基也、復思此人因成益己之物、不但大增己利、卽凡藉艇獲魚者、莫不利增數倍、由是苗族之景況漸更、不似前此之窮苦卑陋矣、他人見其因靈巧獲利甚多、必羣相效之、或依式造艇、或別創異式有用之物、亦能增其利、或有人遊山、見一新奇植物、拔啖其根、味甘而美、卽疑爲可食之品、攜至家、熟而共嗜之、自此所食者又增一物、不必專食魚也、斯人或將是物播種於地、見其收穫實多、遂年年種植、不數年於養家之外、且可售以獲利、於是他人聞知、漸有不願捕魚、而轉欲種是物者、不又興一事業乎、或有人在各類植物中、尋察可食籽粒、栽之培之、漸得五穀之美種、而耕種之事業、由是肇興矣、復有人見一植物、花落實成、與桃奴相似、及花開之後、柔如白絨、彈之則爲熟棉、紡之織之、則成線成布、想苗人曩日、時逢炎夏、袒裼裸裎、不知恥、天遇隆冬、草茅皮革以禦寒、自有此布、則皆欲成衣以章身也、且有人從植物之中、尋出鮮顏麗色、興起各色顏料、自茲以後、技藝振興、而人之交接食用、迭次更新矣、其能如此變乎、故態漸受教化者、有三故焉、一、在有

人不安於舊況、有心才啟新路而立新業、二、因其人能勤於工作、蓄積餘資、三、能用此餘資爲本、恃斯資本以助人工、多出益己益人之物、此知資本於人之用度生財、甚有關係也、

述說中國上古開化之次第、○日本開化之次第、○苗夷粗野之習、或有歷久不變者、其故安在、

資本由政教而增、○若推上意、則知資本由餘利而生、人歷歲漸久、生餘利漸多、而積蓄之資本愈厚、資本既厚、則所成之功愈多、而人之用度優裕矣、亞洲諸國、人煙稠密、人民每歲所入、餬口之外、少有贏餘、一遇水旱之災、啼飢號寒者甚衆、如此苦況、乃因歷代之政俗日非、且缺資本、難創新章也、人心狃於故習、不知製作妙機、藉之多取地利、又不善修溝洫隄壩、預防水患、不知造利用之舟、廣運衆貨、不用良法、開礦、多得五金、人之用度如此、不啻舍臨倉庫、雖穀粟金帛充滿於中、而門戶封鎖、仍困於舊日之苦況也、試觀泰西諸國、人民不似亞洲之衆、近數百年來、多有人創成機器、助人工作、大增所能取之地利、且政教推陳出新、所以人多有餘工、歷歲增

其資本、資本增而人易棄舊營新、大增利益矣、其盛如斯、若將所蓄積之資本均分於衆、當無一人缺其食用、但因有巧拙勤惰儉奢之不同、所以不能無貧富之別也、而理財學之大益、一、在指明生資財之善術、一、在指明如何能令大眾得資財之益、<sup>十五</sup>器物皆爲資本、○器具、機器、及諸等造作之物、能助人工作、益人用度者、皆資本類也、若無此等助人力之物、則類於化外苗夷矣、夫人生斯世、不啻諸事物咸與爲敵、似不容其從容度日者、獸類散於各處、不爲所用、寶物韞於地中、無由能得、卽風雲雷雨、山川草木、亦似相與爲難、不使利益均沾、一旦景况頓更、教化日隆、其時之諸事物、不但不與爲敵、且與爲友、無論飛潛動植、咸聽其驅策、供其食用、通商互市、水火助行、舟車報信、傳書電氣爲其僕役、推之力穡服疇、開礦挖窖、則有各種機器、多獲穀果菜蔬、金銀珠玉、豈非如諸事物咸與爲友、助之度日、使無窮困之憂乎、然非教化、未克臻此、

<sup>十六</sup>實爲資本者、○詳觀以上所論、則知人之一切資財、皆出於地利、人工、資本、地利爲資財之大原、而取地利以得其益、乃賴人工、而資本皆出於人之餘力、可謂爲寄存

之人工以備後日之用、或問何類之物、當視爲資本、曰、凡公用之物、雖有益於人、而無可議價、不能以之交易者、則不可視爲資本、如廣大之洋海、荒蕪之土田、山林之禽獸、河海之鱗甲、均不可以資本視之、惟既墾之田、素育之獸、池沼所畜之魚、人工所作之物、乃爲資本、又如各等有用之材、能助工作、與金銀銅鐵、可易諸物、亦爲資本、因其皆從人工所出也、

理財學卷之二 論易財

第一章 論交易於生資財之關係

交易之由○交易之事起於人工之區別，卽通工易事，懋遷有無之意也。上卷用苗夷漸受教化爲喻，衆苗夷若終於捕魚度日，各家僅食所捕之魚，則不能交易，卽使不僅捕魚，各令其家人婦子分力工作，有種穀蔬者，有種棉者，有織布成衣者，則所得之物，只敷一家之用，仍不能交易，蓋所得之物，雖有數端，而一家所得者，亦家家所得者也，故必專其工作，或業農圃，或業陶冶，或業紡織，或業製造，如此則交易迭興矣，蓋各業必用他業所出之物，且各業所出之物，必有餘，或逾於己之所用數十百倍，而專各業者，能彼此各得所出之物，因其有益人之物，爲他人所欲得也，上古人煙稀少，出物無多，欲用何物，皆以物易之，如此有餘蔬，彼有餘穀，彼此相易，則各得所欲矣，後世人煙漸密，出物甚繁，各業欲親交易，其勢甚難，蓋欲得他人所出之物，倘必親覓其人，與之交易，必至廢時失事，且所覓之人，雖有所求之物，而我之有餘，未必爲彼之不足，雖公立市廛，定期交易，亦覺未便，蓋每數日之間，人人置業赴

市實有妨於工作也。故自古興起貿易者，不耕織，不工作，亦無所出之物，且於交易之物獲利數分，或疑其於衆無益，抑知商賈乃代人親往交易，令其工作增多，或耕種，或織造，所省之工，猶是己之工也，其工增，其利不亦增乎？若推此意，諸國之教化愈厚，所出之物愈多，而交易之事亦愈盛，欲成交易，必多人專用工於其事，亦必多用車船牲畜貨棧埠頭等類，而此諸人諸物，皆於取地利生資財有關者也。

工作愈分，於人之智能有何損益

價值之分。○價值二字，人多並用，欲論明理財學之理，必將二字辨明，令各字有各字之意。上古交易之事雖興，尙未用金銀等類，故未能本金銀以定物價，然各物已有其值，譬如此人有羊一羣，彼人有駝數匹，有羊者欲易駝，有駝者欲易羊，二人交易，不能以羊一隻易駝一匹，因餽養一駝，較餽養一羊費用多也。若商定以羊十隻，易駝一匹，可謂十隻羊值一匹駝也。或有人居近海濱，素以捕魚爲業，以其餘魚，向他人易宜用之物，適近地有農人，欲以餘穀易魚，或議魚以斤兩爲則，穀以升斗爲則，若定魚十斤，易穀一斗，可謂十斤魚值一斗穀矣。細玩此意，各物所值，卽在交易

之時、以此物衡彼物之輕重、或衡人工之多少、如農夫僱人耕耘、商定每月與糧五斗、此五斗糧、卽其人每月之工值。○若問價字之意、譬如一族人商定交易有無、凡物之所值、必以羊隻爲準、或言其物值一隻羊、或數隻羊、或十百隻羊不等、則羊之定數、卽爲諸物之價、邇來有教化之諸國、皆以金銀等類爲交易之準、若言何物之價、乃指金銀若干圓、或若干兩、所以價字之意、乃諸物之值金銀幾何也、然究價之原意、非特指金銀等類爲物之所值、乃指一定之物爲交易之準也、總之、值乃以諸物相較而定、各物相易之理、卽言此物值彼物幾何、價乃以諸物相較、而選一物爲衡諸物之則、後此不將各物與各物相較、但以各物與此物相較、而此物之多寡、爲諸物之價也。

諸物之值因其益人○凡物於人有益、且於人之交易有利、皆能言其所值、亦多有於人有益之物、而無價值可言者、如水之爲物、人不能一日無也、然隨處皆有、殊非難得、則於交易無所出之利、故無所謂之值也、若於缺水之區、掘井及泉、得水以供各家之用、則此水卽有價值、因得此水、必用資本人工也、再如宇宙間之空氣、人人

不可須臾離者也。然人雖非空氣，不能生活，而於人之交易，無利可言，亦無所謂之值也。若人掘深礦，其中毒氣傷人，特製機器，能將天氣催入，令人有可吸之清氣，則此氣因用機器費資本人工，亦可言其價值。又如天空之禽，山林之獸，河海之魚，均於人有益，然未入人手，則未能言其值也。○按以上所言，凡物有益於人，且於交易有利，則能言其價值，亦多有於人有損之物，仍可言其價值者。如鴉片之毒最烈，而不少吸食之人，且甘出重價以購之，又有多類毒物，食則殞命，而人或輕生，或欲害人，則不惜重價暗購之。若揣此意，可知凡人所欲用之物，則於交易有利，不論其物於人之損益如何，皆能定其價值也。

諸物之價值不盡在人工。○按人常用之物，其價值之貴賤，多視乎費工之多寡。然多有價值之貴賤，不專在乎此者。譬金之爲物，其值貴於他物者，一在其物爲人所貴，一在其物深韞於山，欲得之必多費力也。若將從古及今，各國所取之金，與所用之人工互較其價值，則所取之金價，與人工當得之價，無甚參差也。然若覓得金線最旺之礦，費力少而得金多，則此金之值，不在人工，乃在人共珍之，或用製器皿，或

用爲裝飾、或用作錢幣也。數百年前叩倫布乘船尋覓新地、至一島羣、見該處之苗人、雖皆裸體、有頸懸珍珠纍纍者、因彼島多出斯物也。叩倫布遂攜玩物之賤者、易其珍珠、及旋國售賣、其價比買價增千萬倍、可知此珠之貴、非本乎人工、其肯出重資購之者、乃在乎斯物爲人所共好也。同此珍珠、在苗人得之甚易、雖云好之、卻不知寶貴、在諸國得之甚難、皆深好之、遂不惜出重價以獲之、更有古書、古畫、古玩、爲後人所珍貴、雖其物原值無幾、因人爭購買、價值遂增、總之諸物之價值、雖於人工相關、究其輕重、多在乎其物之多寡、與人欲得斯物之心如何也。

物價貴賤之故。○夫物價貴賤、一在其物之多寡、一在人欲得此物之心如何、此乃約而言之耳。究之物價之貴賤、其故甚多、譬如一作坊製造器皿、欲定各類器皿之價、一、在所用之物料、一、在所用之人工、一、在所用之資本、一、在主理之人、所求之利多寡、然價值之最有關者、乃衆人欲得此物之心切否也。若按所言之價、人爭購買、則銷售必廣、而獲利必多矣、或謂有一靈巧木工、自他處至此、見人作器皿有利、則開張新市、所作之器皿、或因料賤、或因工省、或因器具精利、法術巧妙、能較他人賤

售而仍獲利。此時以先之作坊發售其器，不能本乎作成此器之原費以作價，亦必隨乎今用利器妙術，省工省料之費以爲價也。推之多物之價，非在先成此物者之原費，乃在復成此物者有如何之費。○多有物價貴賤不均，乃在人之急用與否，譬如中國北方之大河海口，冬令凍結，船不得入，多類之貨暫存於棧，當時雖阻此貨入口，因非人所急需，諸舖不能遽增其價，因增價若多，人必俟明春凍解方購此物也。亦有多物因人急需，卽增其價，人仍購之。○上言人之急需何物，於物價相關，然亦有需非不急，卻於物價無關者，如乞丐入糧店，雖需糧孔殷，然無買糧之資，仍於糧價無關。或當嚴冬，有衣不遮體者，見衣舖之衣服羅列，急欲得以禦寒，然無買衣之價，亦於衣價無關。此知人需何物，又必有購斯物之資，方能言其急需此物，於物價有關也。

緣此意，請言衣料食物，按人之急需，如何增其價。

少出之物，其價不同。○以常理論之，何物少出，其價必昂，然未必盡如斯也。譬如大洋有一島，該島之人種田者半，捕魚者半，島畔每歲有波浪沖來之海草，漸積漸朽，

有人試用此腐草糞田、而得糧較多、從此捕魚者多、舍其本業、備車馬運糞、向農人易糧、而糞之所值、必視糞田出糧之多寡、與運糞工費之輕重、設有千農各欲用糞十車、且欲以一石糧易之、如此則糧一斗、卽爲糞一車之值、用糞者若歷歲依舊、運糞者亦歷歲依舊、則交易之值、必無更變、倘運糞者、或視糞之值太低、不增其值、則不運、衆農若視此糞所出之地利、只敷往年易糧之數、必不增糧易之、糧旣不增、運糞之業必止、斯乃物值不增、必少出物之一驗也、衆農若視此糞所得之地利、多於易糞之糧、則必增其糧數、然糧數雖增、而所易之糞仍如常、或有欲增糧數、亦有不欲增者、則運糞者售糞雖少、而得糧較多、此知物若少出、一、能停其交易、令人不用此物、一、或有增其所值、而所出之物如常、一、或有增其所值、而所出之物漸少、

多出之物、其價不同、○以常理論之、其物愈多、其值愈低、然必分言其理、試仍以漁農爲喻、或有漁人因捕魚過勞、見運糞能多獲利、遂舍本業以運糞、由是歷歲運糞者增多、農人若用糞如故、易糞之糧數亦如故、而運糞者忽增、糞之值雖未減、而運糞者所得之糧必少、或農人增多、墾地漸廣、而欲用之糞更加、雖多人運糞、糞值不

增而殷勤從事所得之利必增或用糞者衆運糞者少其糧數必增然使運糞者加增農人雖多用糞其易糞之糧數仍不增若運糞者令運糞之道途平坦載糞之車馬衆多取糞之器具精巧雖多出賤售所獲之利仍必增

揣上二段之意請言何如景況某物不能外售於人何如景況某物必增其價值何如景況某物必低其所值

人之逐利與物價相關○夫人之逐利於物價大有干係蓋逐利者乃求利於己不顧他人知何處有得利之機必爭先以求之得利愈多其心愈慰揣茲逐利之意倘能低價得來高價售去必乘機販賣不已若衆商齊行議定何物宜售何價不許一人賤售則於逐利者有礙因逐利者不與他人酌商或售賣先後不一或價值貴賤各異盡在己視得利之機如何也○無論或官或商擬定行規或交易必於何時何地或出售必於何人必以何價均於逐利者有礙蓋逐利則不論何時何地何人何價只顧一己得利而已○或有好名之人存仁愛之意欲衛國保民雖有得利之機亦若視而弗見譬如歲遇饑荒糧價昂貴在徒存利心者不顧他人之困苦只求多

得糧價而已。而若人則仍以低價售之。此乃善念勝其利心也。又如二國交兵。國中之機器局。製造各類兵器。因爲國中之急需。若大增其價。獲利必多。彼猶以常價售之。此乃愛國勝於愛利也。○試復以海島爲喻。發明互相逐利。於物價何關。或言去歲此島之農。共購糞一萬車。每車以糧一斗爲價。今歲因有人視斯糞。益於地利。或有人新墾荒田。須用糞二萬車。夫用糞旣多。若所出之糞。不增其價。必增。然運糞者若不齊行。則必各欲爭得其利。或有急需糧者。微增其價。卽售之。亦有人見糞價增。不肯急售。冀欲多獲其利。則是售糞者。未能一律。或有見售糞者。按今歲所增之價。獲利實多。遂置其業。亦以運糞爲業。因售糞者旣多。其價必落。然不能一時驟落。因人共逐此利。或視糞價漸低。則與農人早定售價。只較常價稍低。亦或視糞價不至終落。仍儲積以待。及其價終落。亦不得不按抵價售之。若其價甚低。運糞者受損。必有人棄置此業。更覓他業矣。以理論之。常用之物。所出之多寡。在乎用者之多寡。其物之恆價。乃就所用之料。與所費之工。核算而定。若不能得其工料之價。則必輟業。而另改別圖。人常售之價。亦在乎視其物益已如何。其價若增。或少用其物。或不用

其物、可見互相逐利、乃購者之益、能令其物賤售、若公議增價、其物果爲人之急需、則售者多能獲利、然如此議增物價、往往誤視斯物爲人之急需、則不能獲利、而反受損也、

物因有益於人而定價、○夫人將諸物陳列於市、若無齊行與運貨脚價之阻、何物售價愈昂、何物之集於市者必多、蓋利之所在、人所共趨也、然售價愈昂、而購者愈少、譬如米一石、售銀三兩、或有千人欲購之、若增價至四兩、必有因價昂而少購米、多購他糧者、則購者或僅七百人、若增價至五兩、購者或僅四百人、購者既少、則米之銷售必滯、銷售一滯、則米價必低、米價一低、必有多購、以圖糴賤販貴、且米價既低、購者必增、低至四兩、或購者仍有七百人、低至三兩、購者仍有千人、夫購者漸增、米價亦必增、若揣斯意、則知人所共需之物、必有適中之價、逾斯價、售者多、購者漸少、減斯價、購者多、售者漸少、惟此適中之價、乃爲皆有實益之價、定斯價者、一在購者之所需、一在售者所應獲之利、二心相應、則適中之價、乃由斯而定、卽於衆有實益之價也、

在市之物價由何而定。○市上陳列之物或論件、論枚、論尺寸、升斗、斤兩、不等。若某物以某價售之、則此類之物雖多寡不齊、亦必隨斯價而售。譬如米一石、售銀三兩、有米商之米、其原價二兩八錢、售米一石、僅得利二錢。又有米商二人、其原價一爲二兩六錢、一爲二兩四錢、若按三兩售之、則每石一獲利四錢、一獲利六錢。設按斯價、願購者尙多、其二商雖多獲利、仍弗欲售、而斯米之價乃在獲利少者所定也。或言若按斯價、購米者少、售米者不獲所求之利、則米之原價賤者、欲按賤價售之、如是、則全市之米價必低、米價低、而原價二兩八錢者、亦必隨低價售之、或屯積斯米以待價、若揆斯意、市人交易諸物、其價非在賤販者所能售、乃在貴販者所能售也。譬如通都大邑、人多日食果品、其貨有自近地運入者、腳費無多、有自遠方運來者、腳費甚重、然因食之者衆、除遠運腳費外、尙有贏餘、而銷售仍廣、此果品之價必本乎遠運者所能售而已獲利、其近運者仍不欲售、猶嫌其利之少也。若按斯價而食之者少、其近運者能賤售獲利、必賤售之、其遠運者雖折本亦必售之、倘歷歲如此、則必輟其業矣。總之物價在乎人之必需斯物、又在乎出斯物多用資本者所擬、以

獲其養生之利也。

貿易之市。○人將諸物運至一處待售於人。斯乃市之常也。若有各種物類。運積於市。斯類之物。與購用斯物之人。可謂爲一市也。試分而言之。在一大市中。按所售之物。或分數市。或數十市。如糧米市。菜果市。煤炭市。牲畜市。金銀衣帽布帛茶葉等市。是也。若在大貿易之區。一物可歸數市。各市有各市之價。譬如倫敦城有大茶商十人。自外洋運來茶葉。分售於本國茶商二十人。其分售之價。必按工本脚費當得之利而定。此大商十人。與本國茶商二十人。當謂爲一市。及茶商將茶分售於萬家茶店。亦必核其原價。與其當得之利。以定其價。此茶商二十人與茶店。又可謂爲一市。而此市之茶價。較初市之茶價必增。此萬家茶店。售其茶於百萬家。各茶店仍必核其原價。與其當得之利。以定其價。斯茶店與百萬家。又可謂爲一市。而此市茶價。較次市之價又增也。售物之人愈衆。公議齊行愈難。購者易由賤價而得。若數客發售。或作坊數家。則易齊行以增物價。其物若爲人所急需。價雖增亦必有購者。然因價重利厚。不久必有他人爭求斯利。售者既多。其價又必漸低矣。

中國各城鎮之集市，因何而有，因何而存。

存積之物，其價增減不同。○存積之物，以常理論之，其時愈久，其價宜愈增，試推論斯意，所存蓄之物，必先費資本以待後利，如人所食之糧，必先用資本購田疇、農器、牲畜，又必播以籽種，勤其耕作，及至收成，又必出腳費運至市廛，儲於倉廩，以備售賣，斯皆爲先時之費，至售時，必按所費之資本人工，與其應得之利，以定其價，或物之自遠方來者，有梯山航海之險，其物或蓄積數年，方能發售，必按其搬運之費，經歷之險，資本數年之息，與夫照料之工，合而計之，以定其價，常見人於蓄積之物，每有從衆之弊，如今歲所獲之麥，不可勝食，則麥價必低，明年因麥價低，而種之者少，其價又必昂，又明年因麥價昂，而種之者多，其價又必低，若能獨操妙算，見他人多種麥，已則少種，見他人少種麥，已則多種，如此則任麥價之低昂，皆可獲益而免損也。○物有蓄積愈久而愈美者，如酒是也，因酒年愈深而味愈厚，又如各類材木，蓄積年久，其料皆乾，成器最固，如斯之物，至售時，宜按資本多寡，年月久暫，與其當得之利，以核其價，當思資本爲人有餘之功，資本若不見利，如人工作而無所餘，不如

蓄積於庫、而無動用之虞、亦有蓄積多日、或損折、或朽壞者、斯類之物、只宜隨得隨售、譬如售鮮魚者、今晨價高、宜急售之、若延至日暮、雖其價大減、亦宜出售、因其物不宜存至明晨也、售鮮菜鮮果者亦然、凡不能蓄積之物、必按時速售、若因故耽延、雖賤售虧本、仍必售之、否則資本全失矣、

物有素定之價、○夫人所售之物、多有素定之價、或其物之值、微有增減、售者仍按素定之價、因恐售價增、購者必漸少、售價減、購者未必多也、常見各類工人素有定價、有時用人雖多、主人不欲增其價、而工人亦不多求、亦有時用人雖少、工人不願減其價、而主人亦不少與、不論何物何工、若將其素價大爲增減、他人亦必有增減之者、蓋恐人守素價不堅、若不增減、於己必有所損也、

交易宜用誠實、○蓋交易者、皆望獲利也、若無誠實、於其交易之事、必見有妨礙、嘗官貪吏詐之國、商務難與振興、雖振興亦必不久、無他、因與之交易者、多原本受虧、或全本告竭、或作工者不能獲其應得之價、受損如斯、寧將資本收藏、不思獲利、亦不敢與之交易、工作受其虧損也、每有貿易者、因貪不正之利、詭譎叢生、曾亦思若

人皆如此、不將此詐彼虞、均受其損乎、如英國之大作坊、以羊毛駝絨織布、因中華北方多出此物、遂與之交易、而華商多以朽穢之毛絨、與沙土混雜其中、令其斤兩加重、當時雖得利加多、而虛僞終顯、以致毛絨之價頓微、雖上等毛絨、亦難獲厚利矣、又此數年中、在中華北方、以麥莖編成細辮、售於洋商、而中華編斯辮之人、與販斯辮之商、均獲厚利、然多有見此得利之機、遽生貪念、或粗其工、或次其料、或短其尺寸、當時雖以低貨而得高價、洋商既受其損、頓起疑心、遂少購此貨、或不出重價、而此等貿易日見衰微、非因貪不正之利、自損其貿易乎、再如泰西諸國之茶、此數百年間、悉自中華販運、近數十年來、中華之製茶者、往往採之不當其時、揀之多混其次、薰蒸包存、其工皆草率、其味遂遠遜於先年、洋商之販茶者、不肯仍依舊價購之、先時雖馳名西國、今則聲價頓減矣、邇來西國茶商、多自日本印度販運、皆謂較華茶味美價廉、自茲中國之茶利、遂爲二國所奪、或問西國之商務大興、其故在貿易者悉按正理乎、曰、不敢謂西國商務毫無弊端、然有妨於貿易之弊端愈少、而其貿易愈興、多有作坊鋪戶貨真價廉、所欠者必清、所許者必應、因而名馳遠近、於其

# 理財學

恆年之貿易，大有所關也。泰西各國有商務日報，備錄國中貿易者之姓字，係何行店，與其資本若干，欠債有無，且按其貿易之盛衰，定其等次，有列於一等，或二三四等者，此報乃助人防虧本失本之危也。其列於一等者，因其忠誠可依，若與之交易，雖不見速利，而終無虧本之虞。如英國之鈔票局，乃國家所設，多有將洋圓放存此局者，年利僅百分之三，然利息雖少，而恆久無失，常見中華放債者，月利或百分之三，因常有失本之險，其利故若是之多也。可知貿易者若心存公義，不至過貪，其貿易必能興隆，彼此均能獲利矣。

中國之大商，多有誠實者，貿易愈小，而誠實愈少，其故安在？○誠實交易之益，既大有明證，何諸國之交易，多有不誠實者？

交易須有才智。○人之才智，於交易有關者，可不言而喻也。倘乏才智，恆爲有才智者奪其宜得之利，蓋有才智者度事屢中，視何者有利，必速圖之，何事招損，必速避之，視何物爲此處之所餘，彼處之所缺，知物價何者將增，則多儲之，何者將減，則少儲之也。常見一市之中，或數十人，或數百人，同此生理，其得利之機，固無分也。然有

爲日無多、全本告竭者、有本雖未虧、而僅救燃眉者、亦有日增月盛、獲利無算者、此無他、因各人之才智有優絀耳、試觀各國之農工、多不讀書識字、不廣知事務、遂囿於其地、困於其事、無術脫此窄狹之況、斯類愚魯之人、常在巧能者之術中、農有所出之糧、不能貴售、工有當得之價、不能實獲、雖工作孜孜、僅能餬口、而才智者藉其苦工、能大得其利也、將有何策能令出力取地利者實獲其利、以足其用度乎、今泰西諸國、文學廣傳、國中之義塾、分設於城邑鄉村、而幼年子女、均識字讀書、其未能上達者、亦須略知地理算學、以及諸國史鑑、又常披閱新報、知遠近緊要之端、至成人時、或爲農、或爲工、因多知事務、則少受欺詐、農知各糧之實價、合宜方售、工知遠近之實價、不至受虧、則才智之農工、必能度用寬裕、大逾於蠢鈍之農工矣、蓋心才明敏、通曉事勢、自能趨利避害也、

中國之農工商爲何少有文學之人、

## 第二章 論諸國互相交易

交易因地勢而殊○各國界內、交易續紛、至與諸國互相交易、理大同也、猶有別者、

蓋國多隔洋海、有迤北之國、夏多清爽、而冬日嚴寒、有近赤道之國、冬不極寒、而夏日炎酷、各國之天氣不同、地脈不一、土產各異、而人之事業、遂由此而分、如人居近海濱、則以捕魚爲業、居於草地、則以牧畜爲業、居平原者、多種五穀、居下隰者、多種水稻、居山林高原者、多植果木、諸國之事業既殊、而所出之物必異、於是以有易無、咸獲其益焉、人若居處相近、易相往來、所用各類之物、其價值必與人成此物出此物所當得之工價、多寡無甚懸殊、譬如農人種麥、若將資本人工統核、出麥一石、必用十工、又有種穀者、每石必用六工、則穀麥之價、必判低昂矣、若其價相等、是六人所獲之工價、足抵十人所獲之工價、人必因種穀之工價優、則種穀者多、種麥者少、然種穀多則多出、其價必低、而人工之利減、種麥少則少出、其價必昂、而人工之利增、穀價既低於麥、則出穀與出麥其所費之工價、必略相等矣、譬一城中有一作坊、一造器具、一織布疋、此二家所出之貨、若將資本人工理事之費統核、其造器與織布所成之貨、設皆費百工、則器能售百銀圓、布亦當售百銀圓、倘織布之作坊、百工所出之貨、能售銀圓二百、則織布較造器其工價倍重、若是織布之業、獲利多於造

器織布者必較多、而出布亦多、造器者必漸少、而出器亦少、布疋多則其價必低、器具少則其價必增、卽執斯二業者統觀之、其價之低昂、無甚區別也、雖言各物之價、必近乎一切工費、然人工有精粗巧拙之分、工愈精巧、愈難習成、其工價必重、所成之物、售價亦必重、其物價雖重、而粗拙之工、不能爭斯利、因無成斯物之妙藝也、交易因國勢而殊、○上言居處相近者、易於往來、此物彼物、若所費之人工多寡相等、其物之價值亦必相等、然斯理不能推至諸國之交易、蓋有多國相距遙遠、運貨之腳價甚重、兼之貨越海洋、有風浪之險、各國有地廣人稀、工作多用機器者、亦有人煙稠密、工作少用機器者、若將各國之人工相較、則知大有輕重之分、譬在中華一人、每日之工價、或得銀一錢、在英國一人、每日之工價、則得銀七錢、二國雖交易有年、中華人之工價未見增、而英國人之工價亦未見減也、試申論之、英國多有作坊、用棉花羊毛織呢布、斯乃中華所缺、而必需之物也、中華多出絲茶、亦爲英國所缺、而必需之物也、於是二國互興貿易、或言英國百工織成之呢布、能與中華七百工所出之絲茶互易、是英國一工可抵中華七工、似此交易、英國人必大獲利、而中

華人必大受損、究之皆獲利也。夫中華人出七百工之價、以得如許之呢布、按斯布價之輕重、不必論英國之費工多少、專論中華之得益如何、夫中華棉與毛無多、機器最少、設織成如許之呢布、或用千工、若舍絲茶之業而織呢布、必大有所虧、蓋輟其多得工價之業、而就少得工價之業也、是以中華人必依舊業絲茶、而購自英國所運之呢布、若英則一工織呢布、足抵中華七工種茶繅絲、此絲茶運入英國、其見利之厚薄、在乎用者之多寡、所好之輕重、大概英人多好飲茶衣帛、每歲所購之絲茶甚多、因茲二物銷售通暢、貿易者則大獲利益、故二國之人工、雖差七倍、而英國人工之價仍不減、中華人工之價仍不增也、若將中華與美國較、其工價之輕重、或差至八倍十倍、然所差雖多、而二國交易至今、所差者仍舊、欲究其故、宜思中華之地、雖廣闊膏腴、而人煙稠密、機器無多、器具並欠精巧、故少得大地所能出之利、且所得之利、必分潤多人、作工者所得之工價、僅敷日用而已、蓋多出工價所得之糧、與所造之物、其售價不抵此工價、農工之主人、不能得其所求之利矣、故工價難增也、況世代人數愈增、亦能使工價減少、美國之地、廣闊膏腴、人煙未甚稠密、多有利

器妙機所缺者人工耳。且地足出其利。工價雖增。而所得之地利。仍足抵之。農工之主人。皆能得其所求之利。作工者亦能得其合宜之分也。美國若弛其禁。令華人隨意入境工作。爭美人之工價。或數十年間。工價尙不至甚低。然久之。人工愈增。其工價必愈減。美國之作工者。必窘於度用也。

中西交易盛興。於衆民之損益如何。○若使中西交易。與民衆有益無損。國中之事業當如何變更。

各國互易之理。○嘗觀本國能出之物價。廉於他國運來者。而人甘出重價購買。其故何哉。譬如英國人所食之麥。多自美國販運。若英人種麥。照運自美國之價售賣。頗能得利。而英國農人。仍不種麥者。因英國之地種麥。則每畝或出一石。售銀三兩。若種各種蔬菜。則每畝所出者。或可售銀六兩。所以農人皆種利多之物。而所食之麥。仍自美國購買也。若推斯意。人居各方。必出其工少利多之物。卽由斯物所得之餘利。自他方購各種欲用之物也。○前言人之資本。漸出於有餘之人工。如是一國之資本。亦必出於一國有餘之人工。此國人欲購彼國所產。其所購之多寡。在乎本

國有餘之產多寡、若餘產少則國窮、必將少購、餘產多則國富、必將多購、譬大洋有甲乙丙丁四島、甲島之人、以種五穀爲業、乙島之人、以種棉花甘蔗瓜菜度日、丙島地皆新墾、人煙尙稀、多植果木、丁島乃初尋之地、大樹成林、山中韞五金與煤、島人尙未尋獲、甲乙二島、因所出者各異、且有所餘、於是互興貿易、以有易無、丙島所出之果品、爲甲乙二島所無、與二島亦興貿易、且植果木者、人數無多、果品之價甚昂、因之斯島之人獲利、速於彼二島之人也、丁島之人、用苦工伐木解板、與甲乙島易五穀蔬棉等類、夫甲乙二島之民、多有資本、但人煙稠密、見利無多、丙島之人、資本雖少、而所出之物、爲甲乙二島所需、且出斯物者人少、因之大得其利、資財日增、丁島之人數雖少、因少得地利、而艱苦度日、厥後有人至丁島、用機器解板、運板片木料於三島、與之貿易、甚爲興隆、其價雖輕、因用機器、多省人工、故得利最厚、後又有人尋得金煤諸礦、以機器掘取、且有人以銅鐵製成農工所用諸器、自茲以往、居斯島者所出之物、爲彼三島人所重用、甘出重價購之、而斯島之人、遂獲利獨厚、資財頓增、曾幾何時、此困窮之鄉、易而爲豐富之地矣、

各國交易之大旨○進推斯意何國與他國之交易隆盛其所出有餘之物必爲他國所特需然舉國之資財漸增非必與他國多貿易也如中華地大物博南北諸省各有所產山林河海下隰平原皆有所生之物儼若合數國爲一國不多與他國交易而人若勤於工作多用機器且有善政休風則出產繁多自能家給人足不至貧窶也○總言此章之大意一此國購彼國之物此物之價非本彼國成作斯物之人工乃本此國成作何物之人工能與彼國之物平易二此國能購彼國所出之物多寡在乎此國所出有餘之物或售於國內或售於他國三國中之資財增多非必與他國多有交易乃在國中所出有餘之物多售金銀或易爲產業耳

### 第三章 論錢幣與錢幣之值

錢幣爲交易之準○價值二字之意前已揭明矣見本卷第二蓋值乃以物較物而定此物若干可抵彼物若干價乃以物較物而選一物爲準則也此章所論特欲發明錢幣爲交易諸物之準其理其用如何凡人交易若無錢幣必以物易物其中多有窒礙之處蓋無錢幣則難定諸物之值凡交易之物彼此各爭其值於貿易實有阻礙

也、且無錢幣、我餘何物、未必能易衆之餘物、必尋一人欲得我之餘物者、而彼之餘物、又必爲我之所求者、譬如一人餘麥、其所缺者穀蔬瓜果衣冠帶履、則必一一尋夫餘穀蔬瓜果衣冠帶履之人、且其人亦必缺麥、若不缺麥、仍不能相易、如此交易、亦必囿於近地、不能行之遠方、惟特選一物、製爲錢幣、將各物與斯物較、議準其值幾何、則易定各物之價矣、製爲錢幣之物、必爲衆所共寶、因有斯物、卽能易其所求之物也、夫人求各物、因各物有可求之益、如五穀益在養生、衣服益在章身、而用爲交易之準者、則有二益、一乃其物原有之益、一乃助人交易之益、如定一羊爲交易之準、而羊之原益、在其肉可食、其皮可衣、今又以之爲交易之本、是復加一益矣、各物之所值、在其能易他物多寡、而一物原有其值、今用爲交易之準、是增其用而加其益、此物之所值必增、如金銀爲物、其原益在成器具、作裝飾、今又以之爲錢幣、其用旣多、其價必增、邇來西方諸國、銀之所值甚低、以銀礦出銀甚多、而數大國之交易、又少用銀而多用金也、諸國若定銀爲交易之準、其價必增、否則其價仍低、可知人用何物爲交易之準、何物之所值必增也、○上言人多用之物、其價必增、然人見

價增必加工多出斯物以求重利所出既多其價又必落見本卷第十六既以金銀爲錢幣固宜增其所值然價之增減亦當視其物出之多寡又當視人出斯物之勤惰巧拙也如金之一物中華旣不用爲錢幣似難增其值然人多以之爲裝飾器具而境中又少開金礦所出無多故金價仍昂中華若廣開金礦且用善法取之雖用爲錢幣其價未必如今日之昂也

當以何物爲交易之準○古羅馬人以牛爲交易之準將各物與一牛相較以定其所值阿比辛伊亞國人昔以鹽磚其磚無大小之殊哀耳蘭牛分蘭人昔以一種乾魚美洲北方土人昔以獺皮東方土人昔以黑白螺以三百六十枚爲一貫黑者一貫抵白者二貫英人新墾美洲曾用螺貫與之交易而彼此交易亦用之其新墾非眞伊亞邦則以煙葉今東印度島與亞非利加洲數處皆以小白螺古時司怕他國人以鐵鑄錢中華亦嘗鑄鐵錢用之諸國自古迄今雖以多物爲交易之準然莫如用金銀銅之多亦莫如用金銀銅之便蓋人居一方若用他物爲交易之準則只可行之於此方未必能通行於他方欲擇一物或數物能爲諸國通商之準其物必衆

所寶重者、其物不可甚少、甚少則不敷交易之用、亦不可甚多、甚多則其值必低、轉運之費必重、而貿易之利必微、如中華之銅錢、近處貿易猶可、絕不能通行於異國、凡國中之大交易、多以銀爲準、以其值較多、而往來之運費輕也、論紬緞爲諸國所欣羨、似可爲錢幣矣、然其物最易露汚、若用爲錢幣、多經人手、必漸損壞、而減其所值、至於珠寶、亦人所共珍、然其值甚昂、若用作錢幣、於貿易細欸、殊覺不便、況大小不齊、未有準值、往來輸納、尤易損失也、

三宜以金銀爲錢幣○今各國多以金銀爲錢幣、其故可略揭焉、一、金銀之值、歷歲無甚低昂、如菽粟布帛、爲人人必需之物、一旦缺少、其價頓增、而金銀之用、多爲器具裝飾、可有可無、非賴斯物以養生也、以爲錢幣、則人人欲用之、其用愈廣、其物之值愈固矣、有人統核世間之金銀、用爲器飾者五分之三、用爲錢幣者五分之二也、二、金銀之用愈廣、人之開採者愈衆、邇來諸國之金銀增多、而爲器具裝飾之用亦增多、需與給相稱、故二物之值、仍不甚低昂、三、前章已云金銀之所值、與歷代採金銀之工費、大略相等、見本卷第四然此百餘年間、因人多尋獲金銀礦之旺者、挖取鍛鍊、

皆用巧妙機器其費較輕於往年其值雖較前微低而工本之利遂較前倍增矣四金銀爲人所共寶以之易他物則其所值者倍多如銀一斤可易糧數百斤或菜數千斤金一斤可易糧萬餘斤或菜數萬斤金銀之以少易多如此若欲運至他方他國其脚費無多於交易少有窒礙若以甚賤之物爲錢幣轉運維艱其不便孰甚如中華之銅錢體重而值賤若與遠方交易以此錢爲幣其轉運之費或較購貨之價倍多因此所購之貨不得不增其價以償此費售價既高銷路必滯而貨之稍爲重笨者卽不敢販運於遠方天下之貿易必大見衰微矣五金銀不易銹壞可以久存各國之出金銀年多一年用者雖多其物亦不加少金銀之體柔最易折磨西國以之鑄成金圓銀圓微加以銅與之鎔化令其體堅耐久以防銷磨之漸按化學之理二金化合所成之體必堅於原體西國用金圓銀圓交易比用金銀之原質尤相宜也按英國之例鑄金銀圓加銅十二分之一而他國則加十分之一也

中國多以銅錢爲交易之準其損益如何○若用銀爲交易之準其損益如何較金銀爲錢幣之益○伊古以來諸國皆貴金而賤銀有數故焉一在用作器具裝

飾金較銀更佳，人之欣羨金器具裝飾，甚於銀者也。二、因所出之礦，銀多，金少，今在諸國之銀，或多於金十數倍，金較銀既如許之少，且爲人之所貴，其值自必昂於銀。在古希利尼羅馬，金銀之值，約差十二倍，金一分抵銀十二分。此數百年間，西方諸國金一分約抵銀十五分有半，二物之所值，常有微增微減之時。西歷一千五百四十五年，歐洲人在南美洲裏透西之山地，尋獲銀苗甚旺之礦，嗣後多有銀自南美洲發至歐洲諸國，而銀遂漸減其值矣。有人統核茲七十年內，以銀易物之值，減四分之一。西歷一千八百四十八年，有人於北美洲之西方，尋獲金礦之旺者，至一千八百五十一年，又有人於奧司大利亞之地，尋獲金礦之旺者，厥後每歲所出之金，較昔多三四倍。有人統核茲十五年内，金之值減七分之一。此十數年間，若以礦銀與礦金較，礦銀之值，年減一年，前一兩金抵銀十五兩有半，今乃抵銀二十兩。二十五兩至三十餘兩，欲究近今銀值低減之故，一、在多獲甚旺之銀礦，一、在以機器取銀，出銀多而費工少。一、在西方多國，大交易皆用金，小交易方用銀。西歷一千八百十六年，英國議院定律，獨以金爲國寶，只以銀爲副貳。一千八百五十二年，美國議

院亦定如此之律。一千八百七十一年，日耳曼國亦定如此之律。一千八百七十六年，復有歐洲數國公議，亦定如此之律。按英國倫敦城爲天下金銀之大市，自一千八百三十三年至一千八百七十三年四十年間，若以礦金與礦銀較，金一兩抵銀十五兩七錢六釐，至一千八百七十六年，金一兩抵銀二十兩，一千八百九十年，金一兩抵銀二十五兩，一千八百九十四年，金一兩抵銀三十二兩。此數年間，因銀價甚低，多有銀礦止工，不復開採，而金礦因金愈貴，皆加工開採，銀日少而金日多，大約逾時不久，銀價必增矣。復思東方諸國，多以銀爲錢幣，此數國之人民甚衆，每歲所需之銀加增，因此可略擬銀價漸長。西國多用金爲錢幣，因較銀貴十數倍，以易他物，其值亦多十數倍，運至他方他國，可省十數倍之腳費。如欲運百萬金圓自美至英，一舟可載，若載百萬金圓所易之銀圓，必須十數舟，其腳費不甚多乎？錢幣當以國法維持。○以金銀銅爲錢幣，國家若定相易之數，其物之貴者，人必韞而藏之，其物之賤者，衆必流而通之。譬如前三百年，和蘭國之都城安司但，諸國交易之大市，此市久有自他國運來之銀圓，特爲交易之用，其中多有銷磨已薄，或剝

削其屑致令分兩大虧而貿易者仍用之此等銀圓年次一年該城雖有寶泉局每歲多鑄足平足色之銀圓發於市廛而高者不加多次者亦不加少因此城中議立大銀號出足平足色銀圓且定例凡有借款必以此高銀圓償還或將次銀圓存於銀號後必付以高銀圓如此施行未久其次銀圓即歸於無有後二百年內此大銀號諸國人視爲穩固安司但城之貿易大興先二百餘年英國亦有人剉削銀圓之屑以圖私利雖定律有削銀圓者擬以死罪然未能禁止也西歷一千六百六十年國中寶泉局以新出花樣印於銀圓冀能除舊用新不意新者隨出隨無非有人韞藏即運往他國而次者仍流通也人因銀圓輕重不等凡定物價不按銀圓之多寡但計分兩之重輕而交易之人因之屢起爭端生意大爲減色事至此極議院定律不准以次銀圓易貨物只准以償國債自此次銀圓漸歸於寶泉局而足平足色者遂通行於國中矣由是觀之國寶若貴賤並用不思善法維持貿易者必以賤者爲交易之用而將貴者存儲也

請問此理於中華所用之銅錢何關○於所用各色之銀有何關

三五  
金銀之錢幣究難持平○上已略言金銀在歷代相易之數約前數百年間金一兩

則抵銀十五兩七八錢近今十數年間金銀相易之數所差甚多遂致多國獨以金

爲交易之準只以銀輔之見本卷第二十三如美國金銀並用其至小之金圓乃面印二圓

五其一圓半圓一角一毛等錢皆銀所製其流通國中核計所值與金圓無分然茲

各類銀圓之值若按其分兩則賤於金圓今若以金圓購礦銀鑄銀圓金之一圓所

購之礦銀能鑄二銀圓此二銀圓按其面值可當一金圓之用蓋人若持此二銀圓

至國家所設之官號易金圓官號必按面印之數以金圓易之也今美國雖以銀圓

爲通寶然不按其本體之值乃按其面印之值用以交易如用票然人貴其物非因

其體之爲貴乃因其上有國印持之可易金圓耳美國議院若定律嗣後不許以金

圓易銀圓則諸類銀圓之值必立跌落只值其礦銀之本體而已無論何國欲兼用

金銀爲錢幣必定金銀相易之數如擬金一兩抵銀十六兩按此數鑄金錢銀錢此

數若與諸國金銀之礦值相符則可同用而無貴此賤彼之弊倘定此數之後金若

加貴人必用銀交易而留金或韞匱而藏或鎔製成器或發運異方銀若加貴金一

兩不能值銀十六兩，人必用金而留銀，由此推之，一國雖欲同用金銀爲錢幣，而一貴一賤，人必用賤而匿貴，然諸國若議定金銀相易之數，與出金圓銀圓多寡之數，則能使金銀之值，不能遽有增減矣。泰西諸國，雖用金爲錢幣，仍輔以銀，蓋其體較金圓賤，而便於日用。若中華日本印度三國，以銀爲錢幣，較便於金，蓋人數實繁，工價甚賤，日用瑣屑，用銀勝於用金也。

錢幣惟當國家鑄造。○以金銀銅鑄造錢幣，皆當國家經理，若聽民隨意鑄造，其錢幣之分兩成色，必不相符，或此輕而彼重，或此高而彼次，優劣既不相同，其值自難一致，不能流通於遐邇，於貿易大有阻礙也。無論何國，若以金銀鑄錢，所加成色之多寡，當曉諭通國，令人咸知，各圓中之金銀幾何，加銅幾何，又當用善術以鍊之，復用機器之精者以成之，令其無毫釐之弊。各圓之面，當有其國之印據，與其所值之多寡也。○或問自古迄今，中國只用銅錢，何不鑄金圓銀圓，應之曰：銅錢之體值甚微，易他物之數亦少，卽剗削其屑，亦無甚用，所以世代遞傳，絕少削磨之弊。若用金銀圓，必有因其體貴，剗削之冀獲私利者矣。無論何國，若用金銀爲錢幣，必須定律，

禁人剽削私鑄，倘有竊爲剽削，使錢幣之本體有虧，則國中銀店概不收納，銀店不收，貿易者必不樂用，但按其體中之金銀多寡，以核其值，有此等錢幣者，必欲急售之，或鎔之以製器具裝飾，或仍歸寶泉局，另行印鑄也。中華自古以礦銀爲交易之用，按其分兩以定其值，然礦銀之色不一，各處之平碼不同，以此貿易，凡農工商賈所應得之利，半爲銀行所奪，蓋用礦銀交易，必須平其分兩，察其成色，爭其價值，殊覺虛擲光陰，於貿易之事多有貽誤，而中華卻不憚其煩，因戶口實繁，人工甚賤，雖有所耽延，不以爲意也。國用銀圓，遠勝於礦銀者有三：一、其面有國印，較銀兩平妥可據；二、流通不滯，於諸貿易甚便；三、能省易銀如許之工，不至稽延時日。泰西諸國，有特設寶泉局，鑄成之圓，與鑄斯圓之金銀價值無殊，卽謂其面值與礦值同也，亦有所鑄之圓，其面值較礦值微多者，若面值與礦值無異，則印鑄之工費，必捐之於國人，若面值較礦值微多，乃國家藉此贏餘，以補印鑄之工費，然因面值微多，則不易流通於他國，蓋他國之人接收此圓，必按其礦值，不能按其面值也。西方諸國，多鑄銀銅小圓，於細微之交易用之，其中多加成色，令其面值多於礦值，此等小圓，人

不運之於鄰封，亦不鎔之爲他用，因其礦值少於面值也。然其上有國家之印，並印其所值幾何，自能流通於本國，或欲以小圓易銀，攜至官號，必按其面值，以足色銀易之也。

金銀流通諸國之理○凡有價值者，若無往來之阻，或購或售，悉可隨意也。售物者必運於市，欲得貴價以售之，購物者必往於市，欲按賤價以購之，金銀乃有價值之物，以易他物，必按其貴賤之數也。或以金銀易他物，是欲售金銀也，必思貴價售去，或以他物易金銀，是欲購金銀也，必思賤價購來。由此言之，金銀亦如貨物，必求善價。何物金銀價高，路又無阻，各方之金銀卽不約而至，及是處之價漸低，則又流於他方，以求善價也。譬甲乙二國，地壤相連，往來甚易，其金圓銀圓，大小相符，用易他物，亦多寡相似，是一國之金銀，無分貴賤矣。然其流通尙少，蓋無所得之利耳。若乙國尋得金銀美礦，每歲所出之金銀，其數增多，其價漸減，若以之購他物，所用之數雖同於昔，所易之物必較少於昔，售物者所易之金銀，必較多於昔矣。如是甲國聞乙國之金銀賤，必多運貨物至乙國售賣，以求多易金銀。乙國聞甲國之金銀貴，必

載金銀至甲國興販以求多得利息由此推之凡金銀賤之國其金銀必多流入金銀貴之國待一二國金銀之價莫判低昂則此國之金銀卽少流於彼國矣夫西方諸國先年未有通洋海之電報諸國金銀之值不能速知其增減今則電報悉通雖遠隔重洋而金銀之值或有增減不難頃刻卽知倘何國之金銀價昂他國必皆運載而來故各國金銀之值不至過分高下也○嘗見何國之金銀出多入少人則以之爲憂料其國之商務必衰若見何國之金銀出少入多人則以之爲喜料其國之商務必興而未必然也倘國中之金銀礦甚旺所出之金銀國人不可勝用若不流通於他國其價必賤不能多易他物也且金銀出國非捐送於他國乃因購他國之物甘以金銀易之或攜往他國乃購欲用之物也夫金銀之益人非在韞匱而藏乃在能易有用之物若金銀出國必有益人之物入於其國焉可知國人之富厚非在金銀出入之多寡乃在德厚才優勤取地利使歷歲之資財日積月累也

國中錢幣當足交易之用○欲論國中錢幣宜有若干宜先思所用爲錢幣者因何而有價值可約言其故一因其物之多寡有所限一因獲此物必費工本一因人人

珍重此物、可知錢幣未成之先、其體原有所值、今廣其用、其所值或微增、非因有國家之印、實因其體中之質也、礦質若多值、所鑄成之圓亦必多值、國家寶泉局、若不扣其印鑄之費、則圓較礦質、其體無少損、圓之所值、未能少於礦質之所值、國中之錢幣、若不足貿易之用、其面值必微貴於礦值、然國中之錢幣、若多於貿易之用、不能因國家之印、令其所值多於礦值、要亦不能賤於礦值、倘錢幣之值、與其體中之礦值、莫判低昂、人必多鎔金銀圓以成器具、作裝飾、蓋或以圓、或以礦、均如此用、其貴賤無分也、由是推之、錢幣所值、非在所鑄之圓多寡、乃在原質之貴賤、其質若多而易得、雖鑄成國寶、所出或不足交易之用、仍爲賤物、少易他物之數、其質若少而難得、人咸貴之、若製成國寶、所出或多於交易之用、仍爲貴物、蓋人若不欲以之交易、能鎔爲礦以作他用也、此知國出通寶、雖多於貿易之用、若不加過度之成色、以賤其體、則於國中貿易、未有大損、然所出既多、國民或存之、或鎔之、國家徒靡印鑄之費、寶泉局每歲所出之圓、若微貴於成此圓之礦、則知所出之圓、未多於貿易之用也、夫以金銀銅鑄爲錢幣、卽爲一類之資財、若以此資財、與諸類之資財較、其所

值未必及百分之一，其有益於人者，在能爲交易之準耳，不必其值與諸類之資財相齊也。○今在西國，運貨則有火車輪船，寄函則有電報信局，貿易愈興，而金銀之轉運愈少，譬如牛約城爲美國大貿易之海口，利非波勒爲英國大貿易之海口，若牛約購利非波勒之貨，歲值千萬圓，利非波勒購牛約之貨，只歲值八百萬圓，是美商當歸英商二百萬圓，方清二城一年之賬，然出入雖有如此鉅款，二城之金銀，卻無煩彼此運解，其償還之款，多用匯票，英商用銀，則自利非波勒發匯票於牛約，向牛約銀店支取，美商用銀，則自牛約發匯票於利非波勒，向利非波勒銀店支取，牛約欠利非波勒之二百萬圓，若牛約之圓價低，英商必討此欠，運回利非波勒，若牛約之圓價昂，英商必將此圓自牛約購貨運至英國，以求利，故美國之金銀，不至流於英國，但以此圓購貨，發至英國耳。

錢幣有勵人之益○錢幣益人，不僅在便於交易，亦在勵人樂於交易，勤於工作，蓋錢幣乃資財中之使用者也，人有錢幣，則能多易他物，人有某物，知某處價昂，則不憚跋涉之勞，必運其物於該處，冀多得錢幣也，人作工必勤，製物必精，亦爲多得錢

幣也。他人所欣慕者，必專心爲之，以迎合其意，亦多得錢幣之心使之然也。錢幣之能勵人益人者，豈淺鮮哉。

<sup>三十</sup>二國錢幣不同，必於交易有損。○若二國交易，此用金而彼用銀，斯二寶歷歲互易之數，倘少有增減，其貿易受虧尙少。惟二寶互易之數，屢有更張，人難預料，則二國之貿易受損實多。試以默國之貿易言之，按歐洲諸國，多以金爲幣，而默國則金銀並用。此二十年間，因金值漸增，默國雖同以二寶爲幣，而國民皆用銀而匿金。久之，默國之錢幣，獨餘銀圓矣。或問其國之金圓何往？蓋金貴於銀，他國又皆以金爲幣，默商往他國購貨，必用金圓。於是默國之金漸流於他國。譬如默商至英國，以一萬金圓購布，運回本國發售，按二寶互易之數，金圓一萬，值銀圓一萬二千。斯商若每金圓欲得銀圓二毛之利，則每金圓之布，須售銀圓一圓四毛。萬金圓之布，共售銀圓一萬四千，可獲二千銀圓之利。然二寶互易之數，增減莫測，默商若疑金圓之值不止此數，則破格以增布價，每金圓之布，欲售銀圓一圓四錢五毛，共售銀圓一萬四千五百，其所增五分之價，特欲防二寶互易不平之弊。若二國皆以一物爲交易

之準、何至復增此價乎、此所增之價、非出自購布之默民乎、是默國因以銀爲幣、常有以金銀受價值不平之損也、且默國銀礦之旺者實多、其銀多出售於諸國、譬默商欲購英國一萬金圓之貨、運至默國、在英國交易、非以銀爲錢幣、銀乃一類之貨耳、其價時有增減、與他貨無殊、此默商若攜銀圓赴英、必有船脚之費、且銀價之多寡莫定、若在本國銀店、購匯票至英、以易金圓、而售票之銀店、恐此數十日內英國之銀價或落、則必增其票價、以防受損、如一萬金圓之匯票、在英或易一萬二千銀圓、在默國銀店、則售一萬二千五百銀圓、多此五百圓者、蓋銀店恐互易之價不平耳、可知以銀爲幣之國、若與以金爲幣之國交易、則常有所損也、○今中華日本印度皆以銀爲錢幣、斯三國與泰西諸國交易、亦必受如上所言之損、若華人欲向英國購貨、必以金圓償貨價、而中華無金圓、必在銀店以銀圓購匯票、至英國銀店支取、或按二寶互易之數、百銀圓可易六十金圓、然售票之銀店、恐取金之時、銀價或低、只以五十五金圓易之、是因二寶互易之數不平、令華商虧百分之五也、或英商欲向中華購貨、必在英國以金圓購匯票、至中華支取銀圓、其互易之數、或六十金

圓當易百銀圓。然出匯票之銀店，恐後銀價將增，只易以九十五銀圓。是英商在本國出金圓六十，至中華取銀圓九十五，亦虧百分之五也。可知兩國交易，此用銀而彼用金，於生意必多阻礙，令農工商賈所當得之利，多爲匯兌金銀者侵蝕也。

問今在中華交易，若以金爲錢幣，以銀輔之，其損益如何？○諸國交易，爲何以銀爲交易之準者，多受虧損？○中國若立時改變，以金爲交易之準，其損益如何？

#### 第四章 論金銀錢票於貿易之損益

出票宜善其用。○諸國之貿易，不僅用金銀銅也，且有出鈔票以當金銀者，又有許國中銀店自出金銀錢票以當金銀錢用者，或問國出鈔票，果裕國便民乎？曰：國出鈔票，以當金銀，國庫無須多存金銀，卽能備持票者之領取，蓋茲票流通於國中，不能同時悉取，譬如國出銀圓之票，共萬萬銀圓，而庫存五千萬銀圓，若能實行善政，使民毫無疑懼，則鈔票在國中流通，與金銀無異，此五千萬銀圓，足遞償萬萬銀圓之鈔票，夫所出之鈔票，共抵萬萬圓，而所存之銀圓，只五千萬，其餘五千萬圓，乃如貸自國民，歷歲爲國用之資，而不出息也。國家若無鈔票，但使金銀圓流通國中，其

體漸磨漸損、及年深日久、國家必將此薄小之圓收回、另出新圓、如此則國家受損、若出鈔票以當金銀、只費票紙、與印票之資、國庫之金銀、少有損傷也、國之鈔票、若值足色金銀、較金銀尤便於用、蓋人身不能多攜金銀圓、而鈔票則雖攜萬張、輕如鴻毛、無不便於用也、國家若許銀店出金銀錢票、則店主得利甚厚、譬有妥實之銀店、出一萬銀圓之票、不必存銀圓一萬、或存三四千圓、即足抵之、商民若無疑懼、必視票如銀、每日或有千銀圓之票領取、店中則仍出千銀圓之票、且有攜銀圓至店易票者、因票之便於用也、如此則店中之銀圓、與店外之銀票、俱周流無滯矣、且所出萬銀圓之票、除歸店取銀之外、其餘之票、不啻貸之於人、而有所獲之利、如店主只備銀圓三千、乃萬圓之票、其中之七千圓、儼若無資本之資本、藉之以獲利、是店主實以銀圓三千、可獲萬圓之利也、其所出之票、能多於所存之銀者、因有房田各產、足以相抵也、倘因他故、銀票同時領取、店主能自他處挪借支持、不至倒閉、仍能再出銀票、多於所存之銀也、總之、店主若有豐盈之資本、所出之票、不逾乎貿易之正用、自能於諸貿易有益無損也、

國出鈔票當先籌備金銀○國出鈔票人民若知國帑空虛不能按票相償必不樂用蓋鈔票只爲取金銀之據耳其所值非在國家之面印乃在能以金銀相償若徒執此票乃無值之物人卽不能富有值者用也中華咸豐年間因髮逆之亂國用不足乃出若干鈔票其面印之銀數自一兩至千兩不等始出時尙如數相償逾二年國庫愈虧不足償歸回之票於是人民疑懼有鈔票者皆欲急出其手以免後日虛擲之虞人之疑懼愈甚此票之價值愈低國家恐負人民設法挽回令人民按歲完國課者許十分之三以鈔票交納其票雖收回而民之受損匪淺也先三十餘年美國南方諸省因役人爲奴之事欲自立爲國結黨以叛當時南省金銀圓尙缺兼有戰陣之需遂出若干鈔票初出時南省之人皆甘用此票蓋欲助立新國以保其役奴之風且冀其國不久立定卽可持票取金銀也四年之中有時而勝票值卽增有時而敗票值卽減及被國軍平滅其票遂等於廢紙南省之人多有徒執空符而家資罄盡者茲四年中美國因備辦軍需亦出數萬萬圓之鈔票面印圓數若干然未明言以金銀圓償之也而國人甘用此票一欲助國定亂令國無分裂之差一望凱

旋之後必如數相償也。當時人民雖用茲票，然不以面印之圓數爲值，其值之增減，恆隨戰陣之勝負。至國軍獲勝，此票之值漸增，迨國家擬定收償此票之日，而各票之值始與面印之圓數無殊也。

先出之票在一千八百六十二年三月至七月，此票只值面印四分之三，至六十四年七月，此票只值三分之一，至六十五年七月，國已獲勝，此票仍值四分之三。自此漸增，其值至七十九年正月，國家擬定償圓之日，其值遂與面印之數無分。

若揆斯意，則知國家之示諭，不能令鈔票有值，其

值必本於金銀。若票不能隨意領取，其值必賤，至無領取之望，則一無所值矣。夫人用鈔票，其值若次於面值之數，於貿易必有所損。蓋貿易之興，多在有穩妥交易之準。若鈔票之值屢有變更，人只能知其今日之值，不能料其後日之值，其值既減，諸類貨物之價值必增，蓋票值無定，貨價亦必不平。由是人皆懷疑莫釋，恐失所求之利，必增貨價以防虧折。有資本者亦不敢借貸於人，恐出票時其值多，及償票時其值少也。財主既多匿資財，不敢外借以求利，則國中之貿易必多阻滯矣。

國出鈔票不可指產作抵。○或謂人有產業，皆可當通寶，爲貿易之用。如有一千洋圓，固可出千圓之印票，或有地一頃，其值千圓，亦可出千圓之印票。本一頃地所出之票，與本一千圓所出之票，所易貨物之數，宜相等也。信如斯言，是國家亦可本國

家之產業出票使民用以貿易與用金銀無殊也先二百年有蘇革蘭人名老約翰亦本此立論後往法國都城開設銀店時法國之輔政者有阿勒安之公爵甚聽老約翰之論遂立官號銀店本國中諸類產業出如許鈔票令民用票與用金銀無異無論完課償債皆可用之在立此官號之初人民爭用此票其值高於金銀老約翰又論國家可以鈔票當金銀借於國民所得之利或敷國費又論民常合夥貿易而國以國之資財爲本亦可立貿易會於是將數大貿易會合成通國之貿易會名爲印度會此會欲民同得其利也遂將會中資本按股分售於人各股面值五百凡克五凡克約值一洋圓國民爭購此股甚至出一萬凡克欲得一股較面值增二十倍者於是國出鈔票不下凡克三十餘萬萬鈔票之多幾如樹林之葉購斯票者咸冀不數年必獲厚利也詎知茲貿易會之鈔票無金銀爲本其貿易未能速得大利計所得者不足償各股之息僅逾數年斯票之值漸低購一股票初值一萬凡克者後僅值二十餘凡克直不啻設紙騙民矣先一百餘年美國羅德哀蘭省之議會定律以省中之田產爲本出五十萬圓之票示衆用茲票與洋圓無殊不意票之始出民卽生疑其值

日減、諸貨之價日增、議會視民不欲用茲票、乃復定律、有不收受茲票者、必罰以五百圓、並黜其舉官之責、奈人之不用如故、農工商賈多閉門罷市、肆行劫掠、議會雖定此嚴律、而無金銀爲本之票、人終不欲用之也、或問本乎國中產業、出鈔票以當金銀圓之用、有何不可、曰、一、因只出空票、不備金銀、民心必生疑懼、卽許以後日必償金銀、因不能立償、其值必減、況積日累月、毫無利息、是人用茲票、如將金銀徒借於國也、二、國家出此鈔票、雖示諭國民、本乎國中之產業、究只空許無據、倘有人執萬圓之票、至官號易圓、一倡百和、蜂擁而至、國家必不能將國中產業、按票之面值、分償於衆也、三、人用何物爲交易之準、必須易於取償、便於攜帶、而田產房屋、皆有定區、雖有所值、不便於用、譬如一人有值萬圓之票、欲游歷他國、而他國所用者、乃金銀圓耳、此票不能易金銀、則不能應人之用、可知欲出鈔票、不可本乎國中之產業、必宜儲金銀圓以備支取、人方樂用此票也、

銀店出票須有國律主治○若任國民隨意出票、無國律主治之、必於貿易大有所損、蓋銀店若資本有限、出票甚多、其所得之利必厚、銀店貪此厚利、必有多出票紙、

少備金銀圓者、當斯店貿易盛興之時、無人疑其所儲之圓、不能數付票之數、越數年、或數十年、此票出入、或與用圓無殊、若貿易漸衰、無力付此票欠、雖向他人借貸、有銀者必不敢出借、斯時所出之票、必如禽鳥旋巢、不約而至、蓋市面蕭條、人皆欲存金銀、不欲存空票、當此之時、斯店能不閉門歇業乎、後雖能變產清償、而有此票者、必多因不能應其急需、大有所損也、美國先年各省之議會定律、有欲開設銀店出票者、必核其實值、質其產於官、至少十萬圓、方准按所質之數出票、然各店出票、雖有定限、一旦變生不測、往往所存之圓、不足償所出之票、及官售其產以償存票之人、其所售之金銀、未有足償其票之面值者也、西歷一千八百六十三年、美國議院擬定新律、公舉大臣一員、總理國中錢政、有欲開設銀店出票者、必經大臣允許、且至少必有五人夥立銀店會、斯會之資本、必值十萬圓、照資本之多寡、以三分之一爲質款、總理大臣卽按所質之數、付鈔票於銀店會、銀店出此鈔票、與本店之票無殊、而國家保此票無虞也、或問銀店如斯出票、所得之利如何、曰、一、國家按所質之數、歷歲出息、如質款若干、年利百分之五、二、銀店將此票借出、或亦得息百分之

五、三、成立此會之產業，亦有歷歲所獲之利。美國南省叛逆之時，國帑不足，欲向民借貸，則售借券，許與重息，值國家有事之秋，民多畏懼，而此等銀店，則能得厚利。如中華之當舖，眾愈窘困，愈爲伊等得利之機。然至亂事既定，國家用銀非急，卽售借券，其息必輕，且國中貿易穩固，斯時銀店出票，必少獲利。按此等鈔票，大有益於貿易，因國家有其質款，民不問其出自何店，但知出票之店，若因何故閉歇，國必按票代償，故能流通全國，與金銀圓無殊也。○在中華除數海口與西國人互市之外，皆用紋銀與銅錢爲交易之準，無用金銀圓者。國中銀店，不多出銀票，而所出之票，亦不能通行於遠方，不知該店能如數易銀否，卽能如數易銀，而相去遙遠，不能遽易現銀，况攜票至該店易銀，店中又多方磋磨，不能按票付銀，誰復樂用此遠來之票乎？然斯類銀票，國家若有其質款，且在各城各店，皆能憑其面印，如數易銀，則富商巨賈，必多用銀票，以省運銀之費也。中華銀店多出錢票，在錢票不但遠方難行，卽在近地，亦不能久流於外，逾日無多，必仍歸銀店易錢，由斯推之，店若無抵質，則所出之票，終不能如銀錢之流通，蓋無國律主治，出票每多於現銀，一旦生意蕭條，銀

店倒閉，人必受其損矣。

問中華當定何律主治銀店，始可令銀錢票遐邇悉通，與銀錢無分也。

三五  
銀店出票當合乎正用。○若銀店出票過多，逾貿易之正用，與多出金銀圓，其關係不同，蓋多出金銀圓，或令其值微低，苟不欲用，可久藏箱篋，或鎔作他用，蓋其面值必隨其礦之實值也。若金銀之礦不多增，即金銀圓多出，亦不能過低其值，倘數年或數十年，人多尋獲金銀之礦，雖金銀圓少出，其易他物之數必少於先年矣。銀店若多出票，其票之行息雖輕於金銀圓，卻較金銀圓獲利加倍，如以四千圓借之於人，行息百分之八，每歲得利不過三百二十圓，若依此四千圓出一萬二千圓之票，其息雖只百分之五，而每歲可得六百圓之利，以票言之，雖只得利百分之五，以圓言之，實得利百分之十五也。所以店主因出票利厚，必貪得無厭，愈多借票於人，而資本短絀者，見店主肯借以票，則創出多端生財之術，因諸類貿易與工作振興，人工必驟增其價，諸物亦漸增其值，久之必有本不敷用，閉門歇業者，因此一家倒閉，亦必波及他人，如狂風折樹，一樹摧折，而附近之樹亦必有同時摧折者矣。夫貿易

之市、若數家同時倒閉、勢必遐邇皆知、人心疑懼、甚至一國或數國、均受其拖累、然斯類事少見於中華、一、因往來遲滯、各處之生涯、少有牽連、一、因諸類貿易、多率由舊章、不知獨開生面、故少受猝不及防之憂、若在新立之國、人多生財之機、且見他人已得大利、則必匠心獨運、推陳出新、在此等國、若無國律主治銀店出票、必逾貿易之正用、不過二十年、未免多有銀店與諸類貿易折本、而國民之受損實多也、

銀票難通行於他國○上論國中出票、若多備實款、使人無疑、則用票與圓無分、本見

卷第二三 若與他國交易用票、殊多不便、譬如一客商自牛約至倫敦購貨、若貨價係十萬圓、付以牛約銀店之票、其人必不受、誠以此票雖能易足銀、而所定者乃現銀、此票只爲取銀之據耳、况銀店未在本國、遠隔重洋、欲取此圓、往返須有腳費、若必付以銀票、亦必增貨價、以抵此費也、可知出國貿易、必備實銀、或滙票、方可隨意用以購貨也、

### 第五章 論所出之物與所散之物何涉

三七 交易愈廣、所散之物愈難料○凡人所出之物、必爲己用、或爲人用、所出之多寡、恆

視人已之需，若其物多於所需，必不易售，卽售之，其價亦必跌。譬如有附近數村，居民數千，其所託之業，皆習常蹈故，未能獨闢新機，又無機器之助，所出之物，少有所值，如農圃所植之穀果菜蔬，必視衆人每歲之所需，農圃如此，他業亦可類推。如製履織布成衣造器諸業，每歲所出之物，必先籌畫此數千人能用若干，因既往以料將來，方竭蹶以成其事，其況若斯。各業所出之物，類皆隨用隨作，不敢費鉅本而存多貨，致有賈用不售之虞也。倘茲數村，越數十年，或數百年，風氣大開，海口則有輪船，陸路則有火車，農工商賈各置機器以助工作，技藝日新，資財日廣，而欣尙之物亦日衆，此際數千人所出諸物，必與先年迥異，所出者銷路旣廣，人之需此若干，他處業此與否，均難逆料，設有大作坊以機器製物，必多用資本，多存貨物，以期販運他方，然遇他國兵興歲歉，或有他作坊與之爭利，則所出之貨，價必跌落，若越一年，或數年，景象復更，欲購此貨者多，其價必驟增，則存貨多者，必得利厚矣。○國中若多立用機器之作坊，本大人衆，工作各有專司，所出之貨，多發售於他國，如此必有才能之總辦、總理各作坊之公務，如各作坊之儲本備材，用人分職，以及用機器，定

物價皆歸總辦酌奪，尤必相機開設新市，使貨物銷路通暢，倘有欲奪其利者，必設法維持，不使受損。大作坊有如斯之總辦，所發售之貨物較小作坊價輕而利厚，蓋大作坊購料多而價廉，用人衆而工速，機器巧妙，用工少而成物多，製造精良，售貨多而運費省，並能立異標新，恰合時尚，持籌握算，獨操利權，所以較小作坊售價雖輕而得利獨厚也。然大作坊亦有可慮者，蓋貿易愈廣愈難，知後日何地易售某貨，何人欲爭己利，億度一有不中，不免有折本之危，且諸般貨物之價恆隨時尚爲低昂，如衣履器皿等件，今年之合乎時尚者，則人爭購之，明年猶是斯物，因時尚已變，無人過問，有先見之明者，每預料何物必合時尚，則加工多製，何物不易出售，則減料少作，然如此加意經營，仍難必其百無一失，不過通盤核算，所得勝於所失，斯爲善於理財耳。○論大作坊有總辦主持，固較散作者出物甚多，得利頗厚，然總辦之勞心於公務，大概多求利於己，若何物騰貴，卽增工人，或增工價，迅速製造，一旦物價跌落，貨物擁積，則裁工人，或減工價，甚至閉門停工，使千百工人無計度日，況斯類之貿易頓衰，而他類之貿易亦必隨之而衰，各等工人不堪其苦矣，惟總辦存仁

愛之心者、見商務頹敗、雖無術挽救、要不忍遣散工人、使之無從餬口、或少開工價、仍令工作、卽不得已、暫爲停工、仍可給以半價也。

貿易盛衰之故○今在西國所出各類貨物、散賣於各市、運售於遠方、多有人相繼而起、以爭斯利、每歲之貨物、當出若干、誠難預料、多有所出之貨、只視貨價如何、價高則多出、價低則少出、究之價高非盡因貨少、價低亦非盡因貨多也、蓋貨物之出入、恆經多人之手、有時某物用之者稀、不知者仍多出斯物、以求高價、有時某物求之者衆、不知者仍少出斯物、以防虧本、欲究貿易之忽盛忽衰、本利之或盈或絀、其故可略述焉、當貿易振興之始、或一年、或數年、農人耕三餘一、因有餘資、以購日用之物、貿易者見購貨者多、貨價則必昂、貨價昂則利厚、必思廣招工匠、優給工價、以期多出貨物、夫工人既多得工價、則家給人足、亦欲購所用諸物、由是各作坊漸推漸廣、別立新局、製造各貨、以逢人之所好、或造輪船、或通電線、或修鐵路、或開寶礦、生財之道、既日新月異、用本之業、亦繼長增多、由是坐擁厚貲者、見商務興盛、甘願借貸於人、而各肆因貨物價高利厚、亦甘出重息借貸、或十年、或數十年、貿易大有

起色、工價日增、物價亦日昂、出貨雖多、而銷售倍速、然利之所在、人爭趨之、久之、所出各貨、漸多於人之所需、則各人所得之利、必年少一年也、夫人啟得利之新章、無論購料、用人、值器、借銀、其費皆多於曩昔、或有本入已多、利尙未見、不得不仍貸於人、以成此舉、然放債者因借出之銀數已鉅、恐後不易追討、則不敢再借、貿易者雖欲存貨以待高價、而借貸已多、恐受重利之虧、不得不賤售其貨、以得現銀、此貨既賤、他貨亦必隨之俱賤、貨價愈賤、人愈疑懼、而不敢多購、斯時貨物堆積、售之則虧折過多、存之則資本必困、各作坊多因此閉歇、卽不閉歇者、亦必減工節費、不敢多出貨物、而工人因減少工價、或被裁汰、則度日維艱、多將田產典賣、以延殘喘、自求利之新章一出、多有費本甚鉅、終至賠累、亦有因受此損、甘於小就、不敢再事更張、而工人亦多遊手好閒、不復勤於工作、人經此艱險、必思維持商務、使之穩固異常、不至一誤再誤也、

貿易之盛衰與人所<sub>用</sub>之物相關○當貿易振興之時、所出之諸物、其類可分爲三、一爲必需之物、如衣食水火等是也、若無斯物、則不能果腹適體、何以養生、二爲便

用之物、如門窗几案等是也、若無斯物、則人生不能暢遂、雖能生活、少有樂趣、三爲華飾之物、如珠寶古玩等是也、此等物均在可有可無之數、出之者乃迎合豐富者之欣慕也、倘災害並至、或饑饉薦臻、則人必思儉約矣、然儉約非始於必需之物、亦非始於使用之物、乃始於華飾之物也、蓋華飾之物、非關衛生之急、欲減浮費、必以斯類爲先、購者既少、則銷售遲滯、出斯物者、必減售價、裁工匠、工匠既被裁減、則度用維艱、不第不能購華飾之物、卽使用之物、亦必撙節、至必需之物、亦不若曩日之豐餘也、夫華飾之物、銷路既塞、出是物者亦必儉以自奉、少購使用之物、出使用之物者、見銷售不暢、亦必裁撤工人、或停止工作、時勢如此、少購華飾之物、與使用之物者、雖仍購必需之物、然在在節儉、出必需之物者、亦必賤價出售、少獲其利矣、可知貿易之減色、有連類而及之序、惟出華飾之物者、先受虧損、出使用之物者次之、出必需之物者、則又其次也、迨貿易復興、其端非肇於出華飾之物者、乃肇於出必需之物者、必需之物多出、則人之度用少舒矣、多購必需之物、漸多購使用之物、必待貿易既興、人之資財日增、則多購華飾之物、可知必需之物、爲貿易之本、貿易之

興必於此始而貿易之衰亦必於此終也



理財學卷之三 論分財

問資財當分歸何人曰按分財之理凡所生之財當歸生此財之人如一人入山行獵所獲之禽獸則爲此一人之財若二人同獵其力同其巧亦同所獲之禽獸則爲二人均分之財矣然常見有數人合夥生理或勞心或勞力亦有不用心力但出資本者其所獲之利問此數人將何以分之殊不易定智能者自以爲所獲之利多因其籌策之才工作者亦以爲所獲之利多賴其勤勞之力出資本者則以爲資本乃獲利之源無資本卽無獲利之望是此三者皆欲多得其利也然其所宜分之利究難悉合其宜毫無所偏蓋三者雖各欲多得終則所得之或多或寡乃在獲利之景况何如耳智能者因其才識逾衆調度有方固必多得出資本者先能擇定其所用之資財當得利若何方肯出其資本亦必多得惟工作者或僅得其工價而已夫工價之多寡半係乎所獲之利幾何半係乎與之爭工者幾何也統論分財之理可略舉四者以明之一曰田地之主二曰資本之主三曰總辦四曰工人

第一章論地租

地租之所出○何爲地租卽地主所獲之租價以償其將田地之利交於租主者也或以銀錢定其值或計田畝分所產定值者曰乾租分產者曰溼租其地或爲田地草地林木之地水利之地建造房屋之地與夫金銀銅鐵煤諸礦欲發明受租之理試先以地租論之如人有田地自爲耕種所獲之利當盡爲己有除用度之外尙有贏餘卽爲餘資若將其地租與他人其所定之租價固本乎其地之肥磽獲利之多寡實視夫用度外之餘資以爲衡在前卷十段已言物價在乎人所必需又在乎多用資本者所必獲之利卽謂物價之定在乎獲利少者所必獲之利也今按此理考究地租之多寡以發明其意設有附近某城之圃其地之肥磽分爲上中下三等種下等圃者其所獲之利只敷用度而無贏餘若索租價必無人承種矣種中等圃者其所獲之利或倍於下等之圃地主必索取租價然所定之價必不能過乎租主所能出之價其所能出者卽用度外所餘之資較下等圃所多獲之利也譬如下等圃一頃每年能獲利二百金此利僅敷其用度無餘資以出租價中等圃一頃能獲利四百金是於用度之外尙餘二百金地主或欲將此餘資盡爲租價租主則欲存留

數分以潤己、互相爭持、此地終必歸於多出租價之人、然其所獲之利、若不足二百金之餘資、租主必常有虧欠、地主若不肯減其租價、租主必棄其地、令尋他業矣、至若上等圃一頃、或能獲利六百元、是於用度之外、尙有四百金之餘資、欲租此地者、必給高價矣、總之地之租價、必以用度外之餘資、以爲衡、有時此餘資多歸於地主、亦有時多歸於租主、租者愈多、此餘利必多歸地主、因人爭給高價也、租者愈少、此餘利必多歸租主、因人少爭此地利也、

租主出地租與其取地利之財何關、○與其度日之景况何關、

運物之費與地租相關、○人運物產至市、其腳費與地租有何關涉、曰、物產之價、定於市廛、必於物價中除此腳費、方爲物產之實值、前段言三等田地、以發明租價之意、茲仍以三地言之、此三地之肥磽、無上下之分、惟分距市之遠近、其極遠之地、若除運物至市之腳費、則僅敷用度、而無贏餘、其地雖膏腴、出產繁多、然因腳費過重、而無餘資、此地若索租價、必無人承種矣、其距市稍近之地、若所獲之利、除其腳費、仍倍於極遠之地、地主可索其租價、而所定之價、不能過其所餘之資、其距城最近

之地、因少出脚費、所餘之資、或倍於稍近之地、其租價或亦倍於稍近之地、然租價之最高者、究不能過其用度外之餘資也。○或問西國多備輪車輪船、於地租何關、曰、總言其所關、乃令相等之地、無論距市遠近、其租價無甚懸殊也、蓋距市雖遠、脚費仍輕、能與距市最近之地、爭貿易之利、夫遠處之物產、既能至此市以爭利、近處之物產、不能不減價以售、租價即因之而亦減、近今英國之地租、較輕於先年、因各國之交易、其脚費輕於先年也、蓋各國之物產、沓至紛來以爭其利、地主若仍索先年之重價、租主皆將失利、無人承種、其勢固不得不輕矣、

中國依近城鎮之地、其租價因何賤於西國、

地價與租價之連屬○按地價之於租價、如資本之於利息、可仍就前段所言之圃、以發明其理、如下等之圃、人既不願出租價以租此地、亦必不願出購價以購此地、雖地主欲以至低之價出售、人將曰、此地僅能供人工之用、若出購價、無從得此購價之利也、其中等之圃、既有人願出租價、亦必有人願購此地、其故何哉、設該處之放債生息者、每百金能得年利十金、若租主每年出二百金之租價、或願借二千金

以購斯地、蓋每年所出之利息、與每年所出之租價無殊也、或富足之家、亦願出二千金購此地爲業、因能將此地租於他人、所得之租價、無殊於放債之利息也、倘該處之放債者、每百金只得年利五金、購斯地者、必用四千金之購價、方與利息及租價相符、要之、利息之重輕、一在乎國政民情、一在該處資財之多寡、一在貿易之盛衰、與得利之機若何、國風愈善、人無失本之虞、故其利息愈輕、資財少而得利之機多、其利息必重、而田地之價、亦準乎此、

居民之多寡與地價何關、

物價與租價無關○前言物產同在一市、何物已鬻何價、此類之物、皆必隨此價而鬻、又言某物之市價、定於難出此物者所必得之利、非定於易出此物者所必得之利、見卷二第十即以前段所言三等之圃論之、其菜價乃定於下等所必得之利、而中等

上等必隨此價而鬻、不能因其多有贏餘、稍減其價也、或地主豁免其一年之租價、租主亦不過深感其情、將所餘之利、歸入餘資而已、斷不能因此而減其菜價也、譬如京城人民、每年必需麥四十萬石、每石價銀三兩、或某地主豁免租主一年之租

價此租主必不因此賤售其麥，卽或稍減其價，鬻於行店，而店主必仍按市價出售，蓋少得糧價，卽少得餘利，非人心之所甘也。其或市價驟落，不得不隨低價出售，乃出於不得已耳。可知出售物產，但隨乎市價之低昂，故曰與租價之重輕無關也。  
地租多寡非盡按乎實理。○以上所論地租之理，若考諸實事，亦有不盡然者。蓋地主與租主，必盡知其得利之機，又必盡用其機。此理方能盡行於實事。常有地主所得之租價，未盡其量者，或因不知其應得若何租價，卽或知之，又因租主承種已久，顧惜情面，不肯奪地而轉租，亦有租主所給之租價，已浮其宜給者，或因不知他處有租價較輕之地，卽或知之，又因居此多年，戀土重遷，不願棄此而適彼。此地租之理，雖不盡行於實事，然不可謂此理與實事無關。蓋租價之重輕，必賴此理而爲之界限。按此理而推言之，可知地租乃關乎地主與租主，非關乎租主與購此地產之人也。至於此理能見諸實事者，乃在其國之風化耳。試以美國論之，地廣民稀，人心活潑，地主與租主才識相埒，地主所索之租價，必盡其量。租主見有租價較輕之地，雖相距寫遠，不惜跋涉之勞，去而之他。如是則地主因能增其資本，租主亦於用度

外饒有餘資，多有今日之租主，爲後日之地主者，由是以觀，地主所索之租價，雖盡其量，亦無所損也。至於歐洲諸國，則異乎此，人煙稠密，田地已開墾無餘，爲地主者，多係世家大族，在先年耕種其地者，名曰佃奴，今此風雖革，而地主之視租主，仍以爲分當顧恤，倘厚索租價，恐負不義之名，有時某城之貿易振興，附近之地，驟增其值，而地主仍不肯增其租價，此乃人相處之情，宜顧惜理義，不專論財利也。再以哀耳蘭之地租論之，其景況又大不相同矣，此島素屬於英，其民與英人不同族，亦不同教，率皆不學無術，窮困自安，無高尚之志，該處之田地，多爲英人之業，地主仍居於英，但遣人經理其事，坐享其應得之租價而已，而經理者，每貪殘很戾，不念租主之苦況，惟求多索以肥己，因該處地狹人稠，艱於生理，故雖屢增租價，仍不乏承種之人，每遇荒年，租主不能如數以償，經理者猶不肯稍加寬免，故常有奪其地而轉租者，統觀以上之取租價，可知此理雖存，而其損益有不同者，則在乎國政民風何如耳。

中國地租之多寡，以何理而定。○中國民地旂地之租價，因何故不同。

<sup>六</sup>草地之租價○草地之取租價與田地之理同，常見有無主之山地，附近之人可隨意放牲，名曰公地，雖有益於人，因無地主，故無租價。至若平原之地，厥草暢茂，倍於山地，用以放牲，能多獲其利，此等地必有地主，名曰私產，既曰私產，即有租價。因於用度之外，猶有贏餘也，可知草地之有租價與否，乃在公地私產之分耳。若夫膏腴之地，人必用以耕種，不肯聽其荒蕪，用以放牲之草地，必皆瘠薄，不堪耕種者也。然亦有田地因耕種多年，地脈衰耗，即撒草種，使之生殖，以獲放牲之利，數年後地脈復原，仍必用之耕種矣。

<sup>七</sup>水利地之租價○靠近流水之地，因有水利可圖，其租價或售價必重，常有自高處下流之水，人築壩以蓄之，內置水輪，激動各類機器，以代人工，因之而獲利，其利之多寡，在乎蓄水之多少，與築壩之難易，距市之近遠，腳費之重輕，以及建造作房之費用幾何也。比如某山之材木多而且美，其山之水亦甚可用，但因距市甚遠，轉運維艱，此等地不能因其近水而索高價，倘數年後有輪車之路，自某大市通至此山，此山之材木，人爭購之，其地因有水利可圖，必遽增其價矣。又如以水沐浴洗衣作

飲食等類、乃人日用所必需、若近水之區、未經人工製作、其水乃爲公用之物、無所謂利、亦無所謂值、倘有人出資本、費鉅工、挖池設筒、引水入城、至各街、以及各家、此水卽有其值、凡水利所佔之地、亦有其值、或租於人、其所定之租價、則在水利之多寡以爲衡、西國如此之水利、多半爲本處之公業、各家按用水利之多寡給值、以歸公欸也。

中國之景況、如何方有水利之地、能增其租價、

房基地之租價○建造房屋之地、其租價與前所論者略同、人租地築室而居、必擇其便於己者、倘於己不便、雖地主不索租價、亦非所願、夫建造房屋之地、其租價最輕者、或與次等田地同、設有租主承種田地、若於所租之地界內築室而居、其租價必仍隨所租之全地、但其地愈肥、距市愈近、其租價必愈重、譬如某人以販菜爲業、於城外租地造房、其地一畝、每年租價五金、若於城內依近大市之處、租地一畝、支搭菜棚、每年之租價、或須五十金、其租價較城多如許之多者、因其易於獲利也、凡城中在大街之地、其租價必多於小巷之地、若貿易者多在北街、則北街之地租、必

重於南街、越數年、或南街之貿易興盛、北街之貿易衰微、則南街之地租必重於北街、亦或此城之貿易興盛、彼城之貿易衰微、則此城之地租必重於彼城、要之地租之重輕、皆在乎貿易之盛衰、獲利之多寡也、先年西國之貿易者、因販運不易、腳費過昂、多有內地之城邑、地租甚輕、近來輪車之路、四通八達、運貨極速、腳費極廉、故諸處之城邑、地租大增、其售價亦大增、若統論鐵路相通之處、其所增之地價、較修鐵路之費、已多數倍矣、

可言他故、能使房基地、或增減其租價、

礦地之租價○按礦地之租價、與田地之租價不同、蓋田地雖有衰耗之時、若荒之數年、仍能復原、而諸礦之所產、非爲無盡之物、所產愈少、得之愈難者、其租價必愈輕、試先以煤礦論之、或有所蘊之煤、非不可用、但次於他處所出之煤、獲利既少、租價必輕、亦有所產之煤雖佳、因去地面太深、不易挖取、更有其煤雖佳、亦易挖取、但距市太遠、難於轉運、此二者皆無餘利以給租價矣、惟所產之煤佳、易於挖取、或距市近而有運路、其地之租價必重、因其多得餘利也、常有產煤之區、因去城市寫遠、

轉運維艱、遂棄置之、近因鐵路暢通、均已開採、其地卽大增其值、至若金銀之爲物、人皆視以爲寶、且易攜至遠方、此等礦地、人必爭先尋覓、雖渡海越山、不辭勞瘁、以冀獲此大利、倘將其苗甚旺之金銀礦地、開採後租於他人、必定極重之價、雖附近之山地、冀有可採之處、亦必大增其值、蓋人有圖利之望、故不惜重價、爭欲得之、及至無利可圖、且多賠累、則其值頓減矣、

西國礦地之租價、因何貴於中國、

## 第二章論利息

利息之大旨○人將資財貸之他人、每年所得之價、卽曰利息、前已言人所集之餘利曰資財、若用之購產、貿易、工作、必因之而獲利、倘貸之他人、必不能使貸主獨擅其利、先約定利息幾何、或問債主將資財貸於貸主、果當得何利息、曰難以預定、須視時勢以爲衡、貸主所能給之息若何、必在乎用此資財、所能得之餘利若何耳、比如有人尋獲極旺之金礦、無力開採、乃貸人萬金、以爲開採之用、約定年利五千金、卽百分中之五十、其息不爲不重矣、若此礦每年能獲餘利萬金、除付息五千金外、

尙有五千金之贏餘，集爲資財也。倘每年之餘利，不足五千金，則不能給此重息矣。如購田開礦修造鐵路等事，皆能獲取大利，故人願出重息以貸資本，冀獲其所欲獲之餘利，而債主所索之息，一視乎貸主之力能歸還否，一視乎其爲人何如，能如所言否，一視乎此方之資財多寡，有與之爭此利者否。常見有新闢之國，獲利之機多而資財少，貸主多而債主少，則其息必重。迨資財漸多，雖仍有獲利之機，而其息必減。如輪車輪船與各類助人工之機器，能滋生資財，然資財愈多，利息愈減。蓋有資財者，爭欲以本生息也。究察生息之理，可知每年所生之息，不能過乎所獲之餘利。若過乎餘利，則貸主必致賠累矣，亦不能盡乎所獲之餘利。若將餘利盡歸利息，貸主毫無所獲，則無人借貸矣。

息重之故。○人常稱爲利息者，往往不專爲利息，其中亦有保險者也。如在倫盾之大金市，英國所出之借票，年利只百分之三，俄國之借票，必須百分之五，土國之借票，則百分之十。夫英國借票只百分之三者，乃英人視其國家穩固不搖，其息雖輕，終無虧折之虞也。俄國之借票，則視其微有不妥之處，若只百分之三，必無人願購。

較英國多出二分之息、以爲保險者也。土國較英國多出七分者、亦爲保險者。蓋英人視土國政令不善、國勢艱危、若出資財購其借票、必索重息、倘數十年間有意外之虞、而所得之息、或能抵其所失之本、故曰保險也。常見中國之人、貸錢數千、以及數十千、或以物質錢、月利必百分之三、實年利百分之三十六矣。如此重息、能不已過乎平常貿易者之餘利。若貿易者出此重息、能不賠累乎。此必窮困之人、無計可施、甘出重息以濟燃眉耳。

國家定利息之制、損益參半。○講理財學者、多謂國家若定利息之制、使人不可逾越其數、然無甚大益、或有所損。按上所論、人之借貸、本爲助其獲利、果有獲大利之機、雖出重息、仍有餘利、乃亦所願。若無此機、自不願出此重息、是所獲之餘利、卽爲利息之限制。若餘利不足以給利息、國家雖無定制、孰肯甘出重息、自求賠累乎。設或有之、必因一時之急需、其暫也、非其常也。可知貿易者若有借貸之事、其息之或重或輕、惟在人之適其所用。如諸物之價值然、雖無限制、而少有所損也。然亦有窮困之人、向人借貸、非欲因之以獲利、乃爲飢寒所迫、甘出重息而不辭。豪富之家、遂

乘機要素重息、或圖其田產、而貸者但求救急於目前、不思貽害於後日、擔此重息、幾如毒瘡徹骨、勢必潰爛全身、不可救藥矣、國家若定利息之制、違律取利者嚴治其罪、如此、則窮困之人、或可少受其累矣、

典物出息、與借貸出息、有何不同、○典物之風盛興、與貧民之度日、有何損益、利息重輕之故、○或問諸處之大金市、其利息之多寡不同、如倫盾之金市、年利或百分之四、同時在牛約則百分之六、在施喀勾則百分之八、其故何歟、曰、此三金市、其利息不同者、可略指數端焉、夫英國建立已久、國律寬平、人心敏達、諸等交易、皆有定則、債主能洞悉貸主之情、甯得利無多、貸於本國、若出其資本貸於美國、則必多索其息、牛約之有資財者、亦願貸於本城、因能親身照顧其事、若貸於施喀勾、必多索其息、因施喀勾乃新立之大貿易城、獲利之機多而資財少、故多有人欲貸資本、以助其獲利、有資財者、亦因此機而要重息、究察利息加厚之故、一在不知他處得利之機、一在不願將資財置諸遠方、專賴他人經理、一在疑他處之貿易、未能穩固也、近今諸國之交往、日以加多、國政民風、日近於善、有資財者、將盡悉天下得利

之機矣。

### 第三章 論總辦

總辦之事功○當教化初開之時、人皆自食其力、於養生外若有贏餘、則集爲資本、且多備器具、以供其用而已、迨教化漸興、人乃分其工、專其業、獲利既多、資本益厚、於是資本之主、或購置田地牲畜、或販運交易、皆能益增其財、無資本者、必藉賴有資本者、爲之耕田工作、以及諸類之事、以養其生、現今泰西諸國、教化大興、輪船來往於各埠、鐵路遍達於城鄉、貿易能至遠方、設廠以造機器、且各類食用之物、人心喜好者增多、而獲利之機、亦增多矣、時事如此振興、要必有總辦其人者、或資本之主自爲之、或工人爲之、然必才能越衆、識見過人、始克稱職、爲作坊總辦者、必知宜用之機器、宜購之物料、宜用之工人、所出之貨物、何類宜多、何類宜少、爲貿易總辦者、必知人情之所好、販運於何方、何時多售何物、何事當用何人、是皆趨其利而妨其害也、常有人出身微賤、在少壯時勤苦作工、而資本之主、見其誠篤多才、以資本付之、與之同分其利、則工人而爲總辦矣、以總辦之才幹論之、可分三等、上焉者、心

敏才練能料大事其所主治之事調度有方億則屢中次焉者雖無高上之才而爲人誠實殷勤能見獲利之機能防失利之損縱未能遽增其資財因其辦事穩妥終無虧折之虞下焉者識見未周料事多闕用人不當措置失宜與上二等角逐利場必致多所虧損可知事業之盛衰係乎總辦之一身廣集資財者固不乏其人折本失業者亦常有之事也

<sup>十五</sup>總辦之利益○諸類貨物售之於市總辦所得之餘利非在售價之中恍如前章所論之地租非在物產售價之中也試卽其理推論之夫各等求利之舉必有人僅足餬口而無贏餘者如菜糧在市之價定於耕下等田者所必得之利諸類貨物在市之價定於多費工力者所必得之利夫利而曰必得蓋非得此利卽不足敷用度以養其生矣譬如某大城中各家所用之器具其價之貴賤一在城中之資財多寡與居人之習好何如一在物料之貴賤一在工人必得度日之工價貨物在市之價定於下等總辦除用度外所必得之利此利較其手下工人之工價無甚加多僅足養生而已若此價再減必不能出此物矣蓋物價中倘有餘利必有減價出售以爭近

利者、凡與同業之人、亦不得不隨價而售、此卽爲物之定價、不及乎此、則不足敷用度以養其生、過乎此、則購主必不肯多給矣、然有才能之總辦、多用資本、多儲物料、多用省人工之機器、用人能因才器使、所售之物、雖與他人同價、仍能多獲餘利、亦或有同城同業之總辦、能料度情事、賤購物料、用尤省人工之機器、照料工人、能多出貨物、雖所售之物、亦與之同價、仍能獲大利、而集餘資、則是同在一市、同此一業、同售一價、一則僅能餬口、一則能得餘利、一則所得之餘利、尤多尤速、可知總辦所得之利、非在售價之中、乃在其人之才幹也、常見有總辦能料大事、廣集資財、亦有資本雖多、且有獲利之機、而事業漸衰、窮苦度日、其景況之不同者、乃其才幹之不同耳、

不用總辦之損益○按前段所論、總辦所得之餘利、在其才幹高於他人、若合夥生理、不用總辦、諸物之售價、雖不見減、而同夥所分之餘利、未必多於應得之工價也、在西國多有人合夥貿易、或設立作坊、延請管理之人、所得之餘利、夥友均分、然與之同業者、共趨一利、互相角逐、若管理者少有才能、必不能多得餘利、可知合夥生

理、要必有才能之人、管理其事、尤必厚其辛金、不然、其人將去此而適彼、此乃合夥生理之定章、而其中亦有易生之弊、蓋管理者僅得一定之辛金、或與夥友均分其餘利、是皆無獲大利之望、卽未必竭其心思才力也、現今西國、凡人喜好之物、愈製愈精、愈出愈奇、是乃有才之總辦、推陳出新、以副其獲大利之望、可知合夥生理、究難與有總辦者、角逐其利也、

合夥生利、當有如何之況、方與工人有益無損、

#### 第四章 論工價

工價亦在分利之數○前論地產貨物所生之利、已講明地主債主總辦所當得之分若何、地主債主所得者、不能過乎租主總辦用度外所能生之餘利、過此則無事租地借貸矣、總辦所得者、非在物價之中、乃因料事之才、雖物價不增、仍能於物價中大獲其利、可知總辦所得之利、非關乎物價、姑置弗論、夫租價利息、卽出田地資本者、所當得之價也、此外卽爲工人當得之價、因所生之利、必藉其技藝也、或問工人當得之工價幾何、曰、未有定限、要必得其養生之用、此外餘利之多寡、一在所作

之工若何、一在與之爭工者若何也、

各國之用度、因何不同、○如此不同、與其必得之工價何關、○諸國之工價當如何比較、方知其實價之別、

工價有名實之不同、○工人之價、有實價名價之分、名價者、乃其所得之工價、銀錢之數若干也、實價者、乃以所得之工價、能易需用之物若干也、譬如天津之瓦木匠、每日工價四百、京城之瓦木匠、每日工價六百、此二處之名價不同矣、然在天津以四百文易其需用之物、或等於在京城六百文所易之物、是二處之名價雖不同、而實價無不同也、或在上海之瓦木匠、其工價與天津同、而上海之食用、賤於天津、以工價易其需用之物、較天津而加多、是二處之名價雖同、而實價不同也、設若所定之工價、雖以銀錢爲準、然不給以銀錢、但給以食用之物、按銀錢之工價折算之、倘所定之物價、高於在市之價、是名價雖多、而實價仍少也、各業之工作不同、若較其工價之多寡、當以一家與一家較、不當以一人與一人較、或業此業者、一家中只一人能工作而得工價、家中人皆賴此一人以餬口、業彼業者、雖婦孺亦能工作而得

工價若將此二家相較則此業之工價雖多於彼業而彼業之工價實多於此業也。工價之多寡亦不當以日計當以年計如農人在冬季未能多得工價至春夏二季工價乃增及秋季收割時工價尤增又如木匠四季之工作無甚參差瓦匠春季之工作較多於他季至冬季或無過問者可知定各業工價之多寡不可但論一時當合一年而統計之也。

工價有多寡之不同○工人得工價以作其工與總辦出工費以成其工二者不可不明辨也夫工人得工價之多寡在乎以此工價易需用之物幾何總辦出工費之多寡在乎以此工費所成之工幾何常見總辦肯多給工價因工人技精事勤其所成之工多則工費少而餘利多又見總辦不多出工價而工人技拙事怠其所成之工少則工費轉多而餘利少在西國之各等貿易與各等作坊倘生意見微須減少工人非先辭工價大之工人必先辭工價小之工人因工價大者能使總辦多得利也。究考諸國之工價惟美國之工價最大英國次之法國又次之俄國又次之中國日本印度爲最小再考總辦所出之工費凡工費少而成工多者乃在工價大之處。

工費多而成工少者，乃在工價小之處。西國之工價雖大，兼用機器以助人工，且多出腳費，將貨物遠運至工價極小之國，仍能大獲其利。

中國之工價少，因工人之成功少乎，抑或工人之成功少，因工價少乎？

工價因教化而增○人民之教化益厚，工價益高，能多易需用之物，工人之度日，益覺寬裕，在無教化之區，人民以漁獵爲生，自食其力，無所謂之工價也。游牧者流，賴所養之牲以度日，或雇覓工人，而工價極廉，因其所作之工，無須心思才智也。迨稼穡之事興，必用人工以取地利，則工價頓增，至教化大興，資財愈厚，人之好尙多，人工亦必加多，且鬪勝爭奇，購者多則餘利亦多，而工價不能不多矣。試問所增之工價幾何？曰：未能預定，一視其人之巧拙勤惰，一視爭此利者之多寡。

西國取地利之法，若行於中國，與工價何關？

工價多寡之故○設有多受教化之人，在他方新闢土地，其地廣闊肥美，該處之工價必大，蓋人既受教化，則好尙多而心思巧，地廣而肥，且在新闢之時，則得利之機多，而爭利者少。凡耕田與諸類工作，必雇覓工人，藉得其利，則工人之價必增，迨後

居民繁衆其地之利必分歸多人工人亦必加多彼此爭工其價頓減矣今美國之工價約多於中國八倍固因人心之好尙不同亦因得利之機美國多於中國而爭工者中國多於美國也若中國之人拓其才識多知取地利之妙法多備運貨之車船多製助人工之機器田地必多出其利各等之事業振興人工之價亦因之而增則人度日之況何至若今日之拮据哉上言教化愈厚人之好尙愈多工價乃愈大此言居民愈繁地利愈分至地所生之利已盡其量而人所能得之利必漸少此二理並行不悖若地利未盡其量居民雖多工價仍大旣盡其量此之多得卽彼之少得趨利者互相角逐惟才能之人能多得地利而富足無才能者必少得地利而貧窘矣

交易之通塞與工價相關○諸國之貿易愈通各類之出產貨物轉運愈速諸等之人工必加多而工價亦大試思人民聚處一方不與諸國相通雖於境內運貨亦無善法而腳價甚重只得就近貿易其所出之物未能精巧因其無得大利之望不能迫其才智聰明推陳出新也如是則人之好尙無多其所需用之物率皆粗狹自安

而相衍成習、及生齒日繁、而地利如故、因而窮苦度日者、年多一年、工人多而工作少、且互相爭工、工價遂減、噫、景況如斯、何怪其窘困日甚哉、倘與諸國交易、其所出之地產、所製之貨物、能運至遠方、而脚費無多、且能新奇佳妙、有益於人、則人爭購之、可獲大利、亦可易他方之地產貨物、如是、則消售多、所用之人工益多、物類多、人之好尚益多、工價自增、資財漸厚、人民度日之況、不亦暢遂乎、

國家當維持工價○或問諸等工價、當任人角逐乎、抑當由國家主理乎、曰、講理財學者論斷此事、其說不同、有云、國家只當施行善政、不當阻此而助彼、任民自相角逐可也、有云、凡國中興利之端、如各類製造局、輪車輪船公司、金銀礦務、皆當歸國家主理、使國民均沾其利、又有人云、諸等興大利之端、不當盡聽之國家、但當擬定善律、以防資財主與各等總辦把持利權、俾工人各得合宜之分、試卽此三論推而言之、古今各國、多有厚斂民財者、少有整頓民間興利之舉者、大資本之主、與才智之總辦、可設法以增其財、各等工人之價、不啻貨物之在市、任人角逐而定耳、近今泰西諸國、風化日隆、有人尋獲各洲新地、人民之好尚倍增、並創造各類機器、又與

諸國通商互市，是皆獲大利之機，且資本愈大者，籌策愈精，獲利愈厚，故多有才智之人，操利權，興大業，擁厚貲，而工人之價，雖優於先年，其度日之景況，亦較勝於先年，然即其所作之工，以核因其工而生之利，究未得其合宜之分，於仰事俯畜外，少有所餘，故每憤懣而不平。今西國製造商賈等事，多有同業齊行，以增其利者，如數處鐵路公司，公議齊行，擬定運價，又有同業連行者，如美國之煤油行，多家合爲一夥，擬定油價，統計其資本，不下二萬萬金，若有不入此連行者，於某處售油，此連行即於該處大減油價出售，必令其賠折倒閉而後已。其他若煉鐵者，造鐵釘者，造糖者，造紙者，織布者，此等連行，不可枚舉，蓋其同業合，則資本大，資本大，則調度易，調度易，則餘利多，倘其經理之人，用合理之法，成其謀利之端，使助手之人，得其合宜之分，亦何不可，奈多譎而不正，私而不公，若任其如此角逐，則農工者流，必終於貧窘，巧能之輩，將獲利無窮，苦樂相懸，未始非人生之憾事，固宜長國家者，調護維持，設法補救也。○今在西國，多有人見角逐之非道，分利之不公，遂謂興利之舉，皆當歸國家主治，使國中工作人等，通力合作，計利均分，可免偏枯之弊，不知此法行於

一家則可、行於一鄉數百人中或亦可、若行於一邑、則難於一鄉、一省又難於一邑、一國更難於一省、蓋人數愈多、其難愈甚也、試卽其難分論之、人生之才智不同、所習之技藝亦異、若由國家主理分派、未必悉合其當、必至舍其所長、用其所短、其難一也、旣曰計利均分、勤者之分不加多、惰者亦不加少、孰能勞力勞心、克盡厥職乎、其難二也、技藝有巧拙之分、巧者與拙者之分無殊、心必不甘、致生怨懟、其難三也、國家必委多人經理其事、所派者豈能皆賢、倘有偏私、分利時未免侵漁偏袒、致起爭競而滋弊端、其難四也、有此四難、則此法終難行於天下萬國也、前已言角逐之事、能激發人心、使之盡其才力、可知角逐實有益於人、不當禁阻、但當設法調劑耳、

見卷二第八

今西國之制、多係君民分權而治、在民主之國、其國律皆民衆選舉之官所

定、卽君主之國、俱有本律、國君之權、亦受本律之範圍、不能逾越、且許民選舉官長、

與議國政、故所擬定之律、多有保護工人之條、其後諒必隨時添補、在奉聖教諸國、

其所定之律、有拜日停止一切工作之條、有婦孺工作、不許過乎其力之條、有工人

作工、不許主理者催迫過乎一定時刻之條、他若輪車輪船之運價、與合夥齊行等

事俱有專條、此等條例、雖未能盡除角逐之弊、實與工作貿易之事、大有裨益、迨教化益厚、民風益醇、則工人食用之資、必遠勝於今日矣、

第五章 論賦稅

<sup>二十四</sup>國家取民賦稅之故○國非財用不立、如設官分職、折獄理刑、設巡卒以詰奸宄、練兵甲以備非常、他若郵政船政海防河工諸大端、凡有益於民而民力所不能行者、朝廷必舉行之、皆所以保民衛民、使之各得其所、各安其業、不然則變亂叢生、大而攘奪、小而欺騙、民不聊生矣、國民納賦稅以供國用、國家行善政以利民生、此古今不易之經也、或問國家取民賦稅、當以何法爲宜、曰、是在其國之貧富大小、民情之厚薄、教化之淺深耳、要之、取民賦稅之理、非爲損下益上、尤當量入爲出也、

<sup>二十五</sup>取民賦稅當酌其宜○民納賦稅、必出於所生有餘之利、雖以銀錢交納、亦地產貨物之所易也、夫賦稅旣出於生財易財之有餘、可知餘利愈多、其納稅愈易、上言國政關乎民生、試觀天下各國、國政善則民之資財厚、餘利多、故納稅易、雖按丁征稅、似重而仍輕、國政不善、則民之生計艱、餘利少、故納稅難、雖輕而亦重、或問征收賦

稅當按人丁乎抑當按其財產乎試思通國人民無論貧富莫不受國家之保衛然貧者但保其身家富者兼保其大業若按丁征稅乃益增貧者之苦耳若將國民之產業盡估價值并其資財通盤計算按其多寡以定稅額似屬均平矣然資財少者獲利亦少除用度外少有贏餘其納稅必難資財多者則餘利多納稅必易且資財愈多納稅愈易以此法征稅仍爲不均也有人推論此意曰國中貧民僅能餬口不當征其稅比如資財自三百金至千金者或征其百分之一自千金至萬金者征其百分之二萬金以上者征其百分之三又有人論不當按其資財征稅當按其一年之入項征稅入項者何卽工人所得之工價農人地產之市價貿易貨物之售價地主之地租資本主之利息也或有稱許此論者曰按入項征稅較按財產尤爲平允因人之資財不皆年年生利也不知人之資財雖不皆生利其爲資本以生利者或在十分之八九且不難於考核以定合宜之稅額人之入項非年年皆同不易考其多寡若按此法征稅必致煩瑣且恐官吏因而舞弊矣

中國征取租稅當以何法爲宜

稅有正副之分○國家徵稅有按產業之價而征者曰正稅有在交易之時而征者曰副稅或問正副二稅何者易納曰人之產業雖多納稅時未必卽有現銀交易之稅乃在物價之中購物者自不覺其隨價納稅矣且副稅之益猶不止此國家可視其交易之物酌定稅則如日用必需之物或可竟免其稅使用之物少征之浮華靡麗之物多征之如是則貧民少受納稅之累富厚者可多納稅以供國家之用在西方各國多有酤於酒者夫酒非人之所必需國家或按其價值或按其觔量以定稅額一以足國家之用一以懲沈湎之風其法似甚善矣然國中之鬪毆兇殺淫蕩叛亂諸不法之事多係酤酒之徒可知但稅酒而不禁酒究非正本清源所益不抵所損也中國之稅洋藥其害亦類乎此論徵稅按其價值或按其觔量海關征收貨稅亦不外此二法若按貨價徵稅商人易設法蒙蔽以多報少而弊竇叢生不如按觔量爲愈也

征入口稅當酌其宜○國家征口岸之稅其故有二一爲國家用款也一爲抑入口之貨與本國爭利也若專爲國用徵稅不妨輕定稅額蓋稅輕則物價亦輕他國之

貨必隨國中所應用者、源源而來、若欲抑他國運來之貨、不使與國中出斯貨者爭利、則重定稅額、因稅重則物價必昂、國中出售斯貨者、可增價獲利、而他國之貨、因有重稅阻遏、不能與之角逐矣、卽與角逐、究不能如本國出售斯貨者之多得利也、或問重定入口之稅、於諸國之人民損益如何、曰、西國講理財學者論斷此事、各執一辭、皆近乎理、試卽此意推論之、夫諸國之貿易愈通、諸國之民生愈厚、此天下之通義、無能辯駁者也、若諸國皆重加入口之稅、商務不將閉塞不通乎、人若泯畛域之見、存利濟之心、必曰輕定稅額、使商務無所阻礙、方爲諸國人民之益、然當今之人、少有念及他國民生者、倘於本國有益之事、卽必行之、雖於他國有損、在所不顧也、或問國家重征入口之稅、以護庇國中出售斯物者、於本國人民損益如何、曰、國家行政、原爲國中民衆之益、非爲多護此等人、少護彼等人也、間或有之、乃於國中製造各局開創之初、偶一爲之、若常久如此、卽非均平之政矣、推思此意、國中出售諸物者、因國家阻遏他國之貨、乃多獲其利、此利仍在物價之中、蓋購斯物者所出之價、過於購他國之貨、少征稅者之價、是售之者於售價中多獲之利、實購之者於

購價外多費之貲也。如美國南方產木棉極盛，因先年國中無織布作坊，美人將綿運售於英，迨織成布匹，英商將布仍運售於美，後美國創設紡線織布等局，賴國家加增入口布稅以護庇之，各局遂高其布價，英商因納重稅，不能如美商獲利之多，今各局之生理振興，本大力足，能與英商角逐矣，而猶得國家護庇，以高價出售，是令此行人多增其利，通國之購布者，多耗其貲也。論英國之稅務，國中多有各類製造之局，與諸國通商互市，薄取入口之稅，故他國貨物皆能運至其國，按英畿輔之地，僅庇炭一島耳，地狹人稠，每年所出之果糧，不敷居民之用，然所出雖少，其價仍廉，因有他處運來之物，與之爭利，而國中出斯物者，不得居爲奇貨也。總之國家征稅，原爲充乎國用，非爲有所袒護，聽國中之貿易，與他國之貿易互相角逐可也。倘重定稅額，永久行之，雖曰護庇本國商民，恐有益於此，必有損於彼也。

中國入口之稅，或輕或重，方與國民有益乎？

理財學卷之四 論用財

第一章論用財有關於民生

人宜善用其財○凡出其財以得衣食器用諸物者，即謂之用財。以常理而論，人之於財，乃陸續出之。如果糧隨食而無，衣物不久自敝，然亦有歷久常存者，如購料造房，可多歷年所也。夫用財之道，與人心之德，樂生之事，大有攸關。如人之於財，隨生隨用，無所積存，其人終必窮困。或用以費煙酒，易淫樂，尤爲心身之害。曠觀古今各國，多有驕奢淫佚，相習成風，以底敗亡者，是皆妄用其財也。惟善用財者，能獲身心之實益。其國之教化必日隆，民生必日厚矣。或問必須用財者，維何？曰衣食居三者而已。在無教化之輩，居於天氣溫和之地者，只分心於所食，居於北方寒冷之地者，又分心於所衣所居，要皆食用粗疏，苟延歲月也。在有教化之國，家人婦子，各盡才力以恤室家，令必需之物無缺，至於便用與華美之物，則在國家之教化淺深，人民之資財多寡耳。夫人之心思益擴，工作益勤，益能出善法以取地利，而快心之器用益增。前卷已言土地所出之利，各有定限，若過此限，而民數增多，則此利將愈分而

愈少

見卷一第三

以生人之常理論之。若無刀兵水火饑荒瘟疫諸災。該處之人必生齒

日繁。及土地養人之利已至定限。

此定限乃謂人取地利所知之法已盡非謂地利果盡也

人不能出新法多取其利。該

處人民不將用度不足乎。教化深厚之國其民能深思遠慮不肯卽早婚嫁爲使所生之子女少而分得之利則不見少也。試觀天下最古之國如中華日本印度人民繁庶雖未得盡地利按其風土民情固已盡其取地利之才可謂至其定限早過民衆足食足用之量矣。人數增地利不與之俱增故窮乏之人年多一年欲謀事者則事狹人浮求作工者則人多工少艱難困苦衣食不周強者去而爲盜弱者餓殍流離且因食用不足身瘠力疲易生疾病故死亡者衆噫景況如斯可勝歎哉或問人民窮困如此何不預爲之計令國民多得地利之分乎曰是在國家之教化不厚耳若能振興學校以啟顓蒙俾通國人民皆能讀書明理謀慮深長自必循理懲慾視婚嫁爲重要之事無養生之路者不遽增室家之累且能創新法多取地利雖人數漸增斷不至若斯之窮困也。

器物堅實之益○夫人器用之物愈常存不敝愈於人有益此乃不刊之理也然有

人云、物之易敝、乃於人衆有益、蓋因售之者多、作是物、多用人工、多所消售也。如前二十餘年、美國施喀勾失慎、一日之間、延燒城中房舍四分之三、其中之財貨無算、於是國中之人、與他國之人、或捐資以濟其災難、或借銀以助其貿易、不數日、工人物料資財、輻輳而至、十餘年後、此城之貿易較前尤盛、此非財物速毀、於人衆有益之據乎。然詳究其理、則知此論似是而實非。夫財物隨毀而盡、不但此城少此若干之資財、亦通國之資財、少此若干之數、少此若干之資財、卽少此若干之利益矣。此城能速興復者、因其爲大貿易之中區、若不遇此災、人工物料資財之至此城者、可散往他處、以得其應得之利。此城之人、亦可藉其未毀之資財、以獲其利。則國中之資本、不更加多乎。或曰、如人之衣服易敝、則製衣者多、成衣之業必興。卽此一端而推、器物易敝、豈非人衆之益乎。曰、否、此非至論也。若貧者之衣易敝、可補綴服之、卽製新衣、必求其價廉者、成衣之業、豈遂興乎。若器用諸物、人以善法製造、使之堅固耐久、人於此物、必省其資財矣。有資財者省之於此、必用之於彼、或飲食求其精、或服飾求其美、向之僅有必需之物者、今則多購使用之物矣。向之多有使用之物者、

今且多增華美之物矣。此豈不與人衆大有所益哉。可知器物常存。斯民生益厚也。

兵燹之後。人民度日之景況。或有較勝於前者。其故安在。

國民納稅之益。○民用財納稅。以供國用。是乃爲己之益。蓋賴國家善政。保其身家事業。以得人生之樂也。如國家設立信局電線。或在國中。或通外國。因之多出新報。能周知各國之事。能知各方所餘所缺。能速定交易。又如濬海口。立埠頭。疏江河。築隄岸。商務於以大興。民之生計日裕。又廣立學塾。令國中幼年子女。皆入塾讀書。更有特定國律。倘有子女已及所定年歲。不肯入塾者。罪其父母。又特立學塾。教民稼穡。俾知何糞宜於何田。何種宜於何地。居於城中者。則修路開溝。置清水筒。電氣燈。以及救火局等類。此各項公費。雖出於民。實便於民也。

人當用財以成善舉。○人之用財。未可僅用之於身。於家。於國也。亦當用之以救濟苦難。蓋人之生命爲重。宜加顧恤。故有才能者。不可吝其才能。有權勢者。不可恃其權勢。有資財者。不可私其資財。皆當拓胞與之懷。泯畛域之見。以仁愛爲心也。如先年中國饑荒。不但本國人捐資賑濟。卽西國人多有樂助資財。以成善舉者。今泰西

諸國多有於施醫院、留養局、育嬰堂之外，特立院收養瘋癲之人，施良藥，用善法，待其痊愈而後出院。又立院救養癡愚之人，或教之讀書，以啟其知，或教之作工，以佐其用。蓋使之日有所事，得以習其身，安其心，俾有生人之樂也。如是之好善樂施，故民風益厚，而民志益尙矣。

泰西諸國，比東方各國多出資財以成善舉，其故安在？

敬神亦須用財。○夫人之於財，大抵用之以養生耳。然亦有用之以敬神者。曠觀天下各國，無論教化淺深，風俗美惡，莫不因敬神而用財。如修廟築壇、焚香獻祭等類，蓋以神能主治人，賞罰人，故其奉事不遑也。西方奉基督教諸國，惟敬創造天地人物之大主，修建會堂，延請教士，所用之財，較國中立學塾育人才之費爲尤鉅。蓋知吾人之生死禍福，悉在上主之掌握，故崇敬服從，引人向道，不爲一己之私樂，乃得身心之真樂。可知敬神之心，人皆有之。因敬神而用財，萬國同之。但所敬者有真僞之分，所用者有損益之別也。

人爲敬神用財，其損益何在？

是書略述理財學之大旨、學者苟能玩索有得、則知致富者非在多獲資財、乃在拓其靈明、增其才德也、願讀是書者、準今酌古、擇善而從、非以贖貨也、亦足禦窮矣、更願人知富爲上主所賜、宜正用之、庶以防其危而收其益也、望之望之、

按理財學之理見之於事者推論數端

一、國家定利息之制、有損益之不同。○攷摩西定猶太國律、凡彼此借貸、不許索息。在古希利尼之賢人、亦言借貸不可索息、有推論此意者、曰、貲財不能發生滋長、債主但得原本無虧足矣、然貲財固不能結實、若以之交易、則能發生貲財矣、譬如以百金購牛數隻、養育數年、必滋生繁多、若鬻之於人、或得數百金、除牧養工價之外、尙能獲利無算、可知用此貲財以爲貲本、卽能以之而生貲財、由此觀之、則有貲本者、明有應得之利矣、試觀東方諸國、少有機器、以貸人工、少有貲本、以成大舉、交易多有阻礙、才識未能明通、借貸者多係窮苦之輩、因饑寒所迫、甘任重息而不辭、如此景況、國家當定利息之制、庶免巧黠者之要挾剝削、使窮乏者負此重債、累及子孫也、然在西國、多用機器、以代人工、貿易往來、四通八達、雖有借貸之事、非因窮苦之故、乃爲貿易之用、其所出之息、必合乎貿易所能得者、如知此貿易、必有千金之贏餘、除五百金之利息外、尙有五百金之餘利、其息雖重、亦所甘心焉、國家若禁止重息、恐阻人獲此大利、且迫人行巧詐之術也、倘國家定利息之制、不過百分之五、

而債主嫌其息輕，不肯出借。於是或有中人說合，此中人與銀店勾通，索使中費百分之五，而以百分之四歸之銀店，是得息百分之九矣。或債主謂借款須取諸他城，當加運費百分之五，是得息百分之十矣。或於出借款時，九五出，或九三出，是得息百分之十，或百分之十二矣。此皆巧避國律而獲重息也。可知國家若教化未興，貿易未暢，則利息當有定制，庶可護衛窮民，少受其累。若貿易興盛之國，人之識見遠，獲大利之機多，利息之或輕或重，均可聽民自便，庶於貿易之事有裨益也。

二、合夥之事。○嘗見造貨物之作坊，有總辦工人之分，工人但得應得工價，而於賺利之多寡，毫無所望。總辦或以己之資本，或借之於人，用以建造作坊，置買物料，開銷工價，其所出之貨，總辦定擬物價，設法銷售，惟冀獲大利以肥己也。若合夥工作，或貿易，不願舉用總辦，乃願於工人中選一材藝出眾之人，主理其事，亦不願借貸資本，但願以己之工價所餘，稍入資本。如此合夥，其所冀望者約有數端：一、因無總辦獨擅大利，其所得之利，皆歸諸夥友均分；二、當製何貨，宜製若干，如何銷售，皆可由己自主，嘗見有善良之總辦，雖貨物滯銷，仍照舊工作，蓋恐工人失業也。然常久

如此其貲本必有所虧，多有爲總辦者，見其事業衰微，或少出此物，或歇業不作，工人之甘苦，在所不恤也。至於合夥生理，當此景況，或照常工作，或少工作，或暫停工，皆由夥友作主。三、免罷工之事，現今嘗有工人罷工者，因見總辦獨擅利權，已則終日勞苦，只得些須工價耳。若合夥生理，則苦樂相關，雖生意蕭條，而所虧尙少。若罷工，則所虧更大矣。四、能使之殷勤作工，且能省料，蓋所出之貨多，而已之得利亦多也。五、工人自理其事，則能使之奮勉，蓋獲利既多，其用度自裕，因自理其事，必增益才能，且欲知遠近商務，必常看書閱報，故能才識增長，漸離愚陋景況矣。揆以上所論，則合夥生理，似於工作貿易之事，有益而無損。然有泰西數國，約在五十年內，多有人設法，使工人與小貿易人脫離窮苦之況，遂講論合夥之事，以此爲拯濟貧苦之良法，多有聽此講論，而合夥生理，然維時不久，虧本歇業者，十有八九。溯其如此之由，一、以數十庸愚所擬定之事，恐不如多材多藝之一人所擬定者。二、同夥之人，防備偷閒費料，以及各等弊端，不如材智之一人照料其事。嘗見一城之中，有合夥生理者，亦有有總辦生理者，而合夥者多見虧折，有總辦者仍復振興，是在總理之

人智愚不同也。試觀天下之交易者，皆存角逐之心，少有推讓之意。譬諸戰爭，其勝負之機，一在軍士之勇，一在將帥之謀。如兩軍對壘，勢均力敵，多半將帥有謀勇者獲勝。如此，則合夥之生理，與有總辦之生理，雖工作同，所出之貨同，而有總辦之生理，仍能興盛者，豈非總理其事之人，智愚不同乎？揆測此意，則知出貨售貨，事業愈大，銷路愈廣，愈當有才能者主理其事，或有小作坊，小貿易，用人無幾，才藝相等，誠實相符，銷路不廣，知一年售貨若干，則出貨若干，此等生理，合夥者或有成效，倘數世之後，各國之人皆以天理爲本，無漁利之心，國家施行善政，足以約束人心，人皆才能素裕，循理而行，如是，則合夥之事，或大見功效也。當今之世，人多私心爲己，合夥之事，恐無所益，或有所損耳。

三、拯濟貧民○在天下諸國各世代，多有窮困之人，衣食不周，艱苦萬狀，以時勢觀之，似終身不能脫此苦况矣。推溯其由，乃因國家之教化未興，雖或已興，而陋俗偏風，未能盡革，民衆不能均得養生之道耳。夫大地之利無窮，既無善法以取之，則不能盡其利，雖有所取，又爲巧黠之人獨攬利權，懦弱者不能得其所應得之利，遂爲

窮困所縛矣。且國家所定之律，多未均平，以致富者益富，貧者益貧，雖事本不公，貧苦者難以銷受，而亦無可如何。亦有君王黷武，妄動干戈，不知兵連禍結，人民塗炭，甚有敗家傾產，子孫無以餬口者。又有邪風敗俗，誘惑人心，甚將不足養生之資財，妄用於無益之事，羣相習染，舉國若狂，其結局安有不窮困者乎？常有豐富之家，心存憐憫，欲救貧民，然其救濟之法，未臻美善，是使懶惰者愈加懶惰，爲惡者仍復爲惡，究不能減其窮困，乃以益其窮困也。試思士庶之家，孰無老弱疾病不能自食其力者乎？則本家之人，固當養育之，然或無力養給，或家道敗落，或孤或獨，是不得不藉外人之憐卹資助也。國家既有此等之人，自當設法調濟，無使凍餒，不然則爲他人之累矣。在衣食贍足之家，雖有遊蕩之子，亦無人過問，因事不干己也。倘其求助於人，則必問其自養之力若何，或問其家保養家人之力若何？若有因行不善，以致窮困者，其國之官長或善士，當查其根由，設法以去其不善。若由國家政治不善，遂致人民窮困者，國家亦當查其根由，更正善律。若由其人之懶惰邪僻，致令窮困者，官長善士，則當設法救濟。然所設之法，若不能變其夙性，究屬無益。此等之人，若使

之食用有餘，則必以懶惰邪僻自安，遂使羣相效尤，而窮困之人將徧於國中矣。在數百年前，英國設立濟貧之工藝局，有欲得國家幫助者，則入此局，能作工者，必量力工作，老弱不能工作者，亦可留養，其後百餘年，有仁人君子，論此法爲不善，謂窮困之人，入局作工，不皆懶惰邪僻之人，多爲飢寒所迫，既入此局，則受人之制，乞人之憐，被屈蒙羞，於理未合也。此論徧傳於國中，終將其章程改訂，乃於各城各鄉設立濟貧董事，惟老弱殘疾之人，入院留養，不能自尋生路者，則求董事覓一工作之地，倘無其地，董事當出公款以養其人，無使凍餒。又有貧家之嬰孩，或私生之子女，董事亦出公項養育之，自仁人君子視此章程，以爲自能減少窮困，豈知窮困者日見多，而出款愈加增矣，其最可憂者，乃使淫風愈熾也。蓋貧窮婦女，雖以淫亂爲恥，然多一私生子女，卽多一進項，故放縱情慾，覩不知恥矣。逾數年，識者深悉其弊，求國家更正此律，於是訂擬新規，濟貧董事但當幫助窮困之人，爲覓作工之所，惟老幼殘疾之人，乃留養局中，不復出公款以養之，此後則窮困之人漸稀，淫風亦漸戢矣。○欲使中國減少窮困之境况，約有數端：一、修改國律，凡國律中與人求生之路

有礙者，卽迫人於窮困也。國之定律，不當偏頗，蓋人之貴不在乎文學爵位豐富，乃由造物主所得之天性也。二、選立卹民之官，夫國律雖善，而官若乖謬，未能持平，黎民必受其殘虐，則窮困因之滋生矣。在循良之官，必設法息其爭訟，亦免人窮困之一端也。三、廣立學校，使庶民開拓知識，自能尋求生路。四、廣開利源，使民博收地利。五、當修造鐵路輪船，使商民便於交易。六、立留養工藝等局，應用安人善法，必無力自養，與無所依歸之人，方許入局。七、禁止乞丐，凡有乞丐，卽送工藝局，罰使工作數日。倘再犯三犯者，則罰工之日期遞加，如結夥強討，僧道惡化等事，則加倍議罰，使自覺乞丐，乃求生至苦之路，要之，國家當定善律，使民能得自然之利，當保護懦弱無能之人，不受巧黠者之侵吞。凡貧民有力工作者，不可賙濟，當使之作工以自養，萬不可使游惰之輩，安然以得其養。試觀天下各國，多有窮困之人，無知妄爲，併無養生之路，自相配合，滋生子女，益復貧窶無聊，不得不仰食於人，此輩實國家之蠹賊也。長國家者，當設善法，革此頹風，則庶民幸甚，國家幸甚。

在中國施衣放粥，各等濟貧之事，當用何法，方能有益。八旗按季關餉，其損益

如何、

四、同行成會○在此百年內、泰西諸國、利源大開、多用工人、多增工價、遂有同行之工人、因而連絡成會、其大旨、一爲保護本行之權利、不受傭主挾制、二爲減去過分之工作、三爲增長工價、使所得之利、與其工相稱、攷西國先代之律、少有護衛窮民之條、按英國先年國律、工人不許齊行、以求減少日工、或多增工價、俱由傭主隨其私意、苛待工人、旣如此偏袒傭主、不但男子作工者、受其挾制、卽婦孺作工者、亦困苦莫勝、幾與牲畜無異矣、一千八百二十四年、英國更正新律、許工人與傭主爭合宜之日工、與相稱之工價、然國律雖改、而傭主之貪心不悛、於工人之日工、工價仍欲照舊、因此數年中、罷工鬪毆等事、層見疊出、以致傭主工人均受其損、各等交易、亦大爲減色、旣經歷此事、傭主不敢迫脅工人、而工人之境況漸有起色、工作貿易之事、亦漸興盛、豈非善律之功效乎、考查各國、愈有善化、國民愈能通明、愈重信義、工人之工價愈增、而用度必日裕、資本主與傭主亦多得餘利、夫傭主挾制工人者、蓋欲損彼以利己、不知益彼、正所以益我也、國家若能設立善法、護庇愚魯之人、大

有所益也。如同行之會，固可見其益，亦當防其損。爲工人者，不當欺凌資本主，倘資本主不能得其應得之利，勢必收本不作，傭主無本，必至歇業，工人亦因之受損矣。亦不可欺凌傭主，倘傭主不能得其合宜之利，必不肯徒勞無益，亦必辭退矣。無論工作貿易，若無聰明練達之人，總理其事，必至大受虧損，而爲工人者，不亦因之同受虧損乎？按同行成會之實益，乃使工人開發聰明，增長技藝，多知得利之機。凡國家所定之律，傭主所擬之條，有不利於工人者，能指明而辨論之。至於罷工之事，會中當極力攔阻。夫工人罷工，在後日或有所益，以當時論之，資本主傭主工人以及各等貿易均受其損也。倘傭主工人有爭論之端，此會當請誠實通達之人，以斷定之。庶能各得其應得之益，且當開諭工人，使知上代之規，於工人有妨者，不能一時盡革。若見風化日善，工人之景況日新，則當安分作工，目前雖猶有所妨，後日庶盡能除去，則工商之事業，蒸蒸日上矣。

中國之律，與工人有關者，當如何更改？○中國之工人，齊行罷工，其損益如何？五、徵租歸公之誤。○先數年，英國有講理財學者數家，謂世人所用之物，皆由地而

出、因地爲生物之源、故有其值、既有其值、地主若租之於人、則必有價、租價之多寡、每隨地值之多寡、地值之多寡、在乎其地所出之利多寡、大約人煙稠密之處、貿易興盛之區、其地值必昂、夫人必勞力勞心、始能度日、而多有地主、坐享豐盈、似爲其人獨闢利源也、按此數家所論地價之增、非由地主之力、乃由人民之多、租價旣因人衆而增、不當爲地主獨享之利、當爲人衆共得之益、又推論此意、曰、國家當派員查勘各地、隨其有益於人之多寡、以定其租價之多寡、勘定之後、無論何地增租、則以所增之價、歸爲公欸、以成民衆有益之舉、地主有不欲以所增之價歸公者、須按官定之地值、鬻於國家、則以其地之租價歸入公欸、按此等章程、先年所增之租價、仍歸地主、自勘定以後、無論增價若干、皆歸公、以益衆、然此數家所論、不過徒託空談、並未定爲國律、倘依此而行、恐百弊叢生矣、夫曰歸公、則必派員主理、所派之人、難免有偏袒侵漁之事、其弊一也、不過數年、必須復行查勘、再定租價、屢經更改、難免有賄買情託之事、其弊二也、雖有上等地產、常增租價、然旣歸公、於地主毫無所益、勢必心志頹敗、是使民不能有熙熙皞皞之風、其弊三也、前二十餘年、有美國卓

氏者講富國之學與上相仿而較上爲尤刻謂大地之在天下不當視爲一人之業當視爲萬人之業近代以來生資財之路旣已增多資本主與地主獨擅厚利而工作之人助之得利者不能少有分潤實爲不平之事嘗見工作增多貿易興盛富者擁鉅貲獲大利自奉儼若公侯而工作之人依然貧苦一溯其致此之由乃因地利不能均分其不能均分之故最大者卽地值屢增資本主與地主皆據爲己有不肯稍分於工人也地主若以租價歸公國人之獲益良多矣一能成各等善舉如修道路立學堂施醫濟貧等類是也二能使國民均富夫人之地產愈少歸公者亦愈多人必不願多有不得利之地如是則夙爲豐富地主者自不能坐收大利與齊民同矣三各類機器之利可多爲工人所得不爲地主資本主所獨擅蓋機器雖增所出之利而地主旣按其地之等次出租機器所生之利不能侵蝕矣工人見利之所在亦能與資本主爭其合宜之分矣按卓氏所論自詡爲醫國手聆其論者亦多鼓掌稱善然究未定成國律亦未通行各國也倘按其所論而行實於民大有所損試卽其弊而推論之一凡有地者按其地值出租歸公或有地主其地可值萬金每年入

租價千金則必以此千金歸公矣。須盡力耕耘始能餬口。是使入千金之富翁變爲耕下等田之農夫矣。在卓氏之意非爲虐待地主。謂地非上天賜於一人。乃賜與萬人者也。然其書所論人惟勞其心力所得者乃由己所用。試卽其意推論之。常有先代之人自作苦工克勤克儉積其擲節之餘資買購田產以爲子孫計。豈非自勞心力而得者乎。若自其子孫奪去大傷天理矣。倘<sub>三</sub>此法定爲國律者其變亂人民養生之道莫此爲甚也。<sub>二</sub>查勘各地以定租價逐年<sub>三</sub>或增或減雖選派公正之官所定亦未必公平。若貪墨之員其弊不可勝言矣。<sub>三</sub>若按此而行地主必有無力出此租價者亦必有不肯出此租價者因而多有地產歸公國家須派員主理由官管理之田地其所出之利必不能如自治其田者所出之利以常理而論人爲己之利益勞其心力較之爲人尤必勤慎也。<sub>四</sub>按各國之徵取於民者必隨國家用度之多寡以定國課之重輕使國庫充溢恐爲國家奢侈之漸也。若按徵租歸公之法其所入之欸勢必逾乎國家之用政府見府庫充足未免妄有所用糜國之帑啟人之私百弊可由此而出矣。<sub>五</sub>此法若行恐不能增工人之工價反減其工價且恐難覓工

作之處、蓋大地之值、乃出資本之一大源也、若地租歸公、則地之值、必自此不增、其值不增、則此等資本亦不增、工作貿易之事、必大爲減色、工人亦同受其損矣、按卓氏所論、在某國資財愈增、則地之值、亦必愈增、其所增之利、地主傭主均得其分、而工人未免向隅、此論亦有所誤、常有製造之物、其所售之價、多在人工、與其技巧、少在自地所出之料、如木料自地而生、其值五金、若製爲粗器、可值十金、是所得之價、半由於料、半由人工也、若用此料、製成精妙之物、或值百金、其所得之價、除料值五金外、非盡由人工乎、又如礦鐵百斤、僅值一金、若以製物、或值十金、百金、千金、不等、總由於省工費工、或精或粗之不同耳、由是而推、地值非盡因資財之增、卽隨之而亦增也、夫地固爲出物料之源、而物價之昂、非盡在於料、乃多在人工之精巧、所增之物價、工人必有其分、不然、豈肯勞其心力、以成斯物乎、卓氏所謂他人愈富、工人愈貧、其論實與各國之時勢不合、以西國現今之工人與先百年之工人較其工價、有多一倍二倍三倍者、且其工作之路、較先年而愈廣、由工價而得養生之資、益倍於先年、今下等工人、其用度、與先百年之中等同、中等與上等同、今上等工人、其度

日之況較先年豐富之家尤爲暢遂也。人居塵世之間固不免窮苦之輩欲醫此病者若用徵租歸公之法非所以治其病乃所以增其病也。如中國王安石創設新法青苗免役等事其意亦欲便民也。不知百弊叢生人民愁怨豈非立法不善反以病民之明徵哉。

六、銀店之益○在中世代泰西雖有銀店而其益尙少。耶穌後一千四百有一年西班牙之巴色羅那城有設立銀店者。一千六百九年荷蘭之安司丹城有設立銀店者。此銀店有百餘年之久其於諸國之造作交易大有裨益。一千六百十九年日耳曼之罕布革城有人開設銀店。一千六百六十八年稅典之司他克很城有人開設銀店。銀店之出銀票自此店始也。此後二百餘年在泰西諸國開設銀店者指不勝屈。竟成工商之血脈矣。其所以有益於人者可分言之。其一能收存有餘者之貲財。夫人開設銀店當裕有資本以保收存他人之貲財能如數而償亦當有國家之允准方能開設。人存銀於店其益有三。一可防丢失偷竊。二可免銀錢在手隨意妄用。三可得利息。先年貿易未振興時存銀並無利息其益僅免丟竊妄費而已。近來存

銀者則以利息爲重其息之重輕在乎所存之久暫其一二能清結存銀主之帳目人存銀於店店主必與以冊簿書明存銀若干又與印票一本存主欲撥銀於某卽於印票寫明數目某執此爲據往銀店支取店主與存主按時清算有如此之規存主可因之省心省工也且人以銀購貨其交易愈大者愈少用現銀如北京商人往上海購貨其價萬金該商無須攜帶現銀只在北京銀店買萬金之匯票在上海之銀店交兌近來西國諸大貿易城皆設立結帳公司各銀店每日派人執欠己之匯票至此公司與各銀店所執之匯票核對卽由公司清算了結此亦省工速結之一事也英國倫敦城之公司每年所清匯票銀兩約六百億之多其一二能借銀生息銀店本欲借銀與人以得息亦願將他人所存之銀轉借與人亦可生息蓋存銀之息輕轉借與人之息重也然須自顧資本足敵外欠否在百工振興之時得利之路多多有措借於銀店以成其得利之事者倘銀店總辦誤以其事爲可靠視所約者爲合宜則受其保券借以銀兩及生意衰落不能如約而償此券或減其價或作廢紙銀店因而賠累甚至歇業與此店有關者均受虧損矣大銀店不止借與工商亦嘗借

與國家、如戰爭饑饉變亂之事、或諸等益民之大舉、國用不足、則向某銀店、或數處銀店、售以出息銀單、銀店或出本店之銀、或轉售銀單於人、按所定之銀數、交納國庫、其四能得日限票之利、如大商將貨售之於人、或訂日限以歸售價、購主在某銀店、按其應歸之數、開日限票一紙、須有妥實擔保、銀店即出此票、寫明付銀日限、倘商人欲用現銀、可將此票在某銀店支取、然必扣息若干、大概銀店借銀與人、或以國家之出息銀單爲保、或以輪車輪船金銀礦等類之股票爲保、或以各類作坊之產業爲保、亦或以寄存棧房之貨物爲保、如此借銀、不但本店得利、於各等工商、均有裨益也、其五能得銀票之益、大凡小交易多用銀錢、大交易用之不便、若以銀票交易、與現銀無異、實爲兩便、銀店亦必欲出銀票、因藉銀票得利、較藉現銀爲多也、

見二卷三十一

若出票者果有資本作抵、於諸等造作貿易、豈無裨益哉、統觀以上五段、可

知銀店若以善法開設、實爲諸國諸人之益、然須善律維持、良吏治理、方能實獲其益也、

理財學終

## GLOSSARY OF SPECIAL TERMS

*Employed in this Text-book on Political Economy.*

*Note.*—No attempt is made to gather up and define technical terms occasionally employed that have come to have a fixed and current meaning in the New Learning of China.

Bank note	錢票	Government bills	鈔票
Bill of exchange	滙票	Interest	利息
Business partners	夥友	Labor	工人
Business regulations	行規	Laborer	工人
Capital	資本	Land-owner	地主
Capitalist	資本家	Landlord	地主
Cheque	銀票	Market	市場
Coinage department	寶泉局	Money	錢幣
Commerce	貿易	Poll-tax	丁稅
Competition	角逐	Port	埠
Consumption	用財	Price	價
Co-operation	合夥	Price (of land)	地價
Creditor	債主	Private property	私產
Custom-house	海關	Production	生財
Distribution	分財	Products	貨
Division of labor	分工	Property	地產
Duties	海關稅	Proprietor	貨主
Duties (entrance)	入口稅	Public property	公地
Duties (exit)	出口稅	Rent (price)	租價
Duties (foreign)	洋稅	Rent (in money)	乾租
Duties (to pay)	納稅	Rent (in kind)	溼租
Duties (to collect)	收稅	Rent (of land)	地租
Entrepreneur	總辦	Rent (of pasture)	草地租
Exchange	易財	Rent (of water-privilege)	水利地租
Exchange (standard of)	交易之準	Rent (of building lots)	房地租
Factory	機器	Rent (of mines)	礦地租
Freight	腳費		

Revenue	稅課	稅款	稅銀	Trading company	貿易會
Revenue (fixed)			稅額	Transportation (cost of)	運物之費
Revenue office	稅局		稅關	United production	夥作
Smuggle			漏稅	Value	價值
Strike	齊行		罷工	Value (face)	面價值
Tariff			稅則	Value (bullion)	體值礦工
Taxes			稅	Wages	工價
Taxes (direct)			正稅	Wages (real and nominal)	實名實之
Taxes (indirect)			副稅		工價名實之
Trade			交易	Ware-house	貨棧
Trade combination			連行	Wealth	資財



# POLITICAL ECONOMY.

BY D. Z. SHEFFIELD, D.D.

## ENGLISH INTRODUCTION.

The following compend of Political Economy is the result of classroom instruction. Since it has been prepared to meet the needs of one institution of Western Learning, it is hoped that it will prove of service in similar institutions. The work is not a translation, but rather an adaptation. Walker's Political Economy has been chiefly consulted while engaged in its preparation, but whatever has been taken from this or other sources has been used only as material, and has been arranged in such form as was thought to be best fitted to meet the needs of Chinese students. This science concerns itself with a wide variety of human activities, and its exhaustive discussion must needs be committed to specialists, each dealing with his department. But though the details and applications are well nigh endless, the principles of the science are relatively few and simple, and are susceptible of a comprehensive and pispicious statement in a volume of very moderate dimensions.

A few questions are asked at the end of subordinate divisions to stimulate students to more careful thought on the matters in hand. These questions can be multiplied by the teacher in the daily recitations, thus helping students to a fuller grasp of the principles set forth, and enabling them to apply these principles to a great variety of conditions. This book, if thus used as a guide in study, will occupy a full half year in class work, which should include a careful review with final examination. Students are occasionally required to write essays on the more important topics, the study will prove of greatly added value.

This science is closely related to that of Ethics, and in teaching emphasis should be given to those ethical principles that ought to govern in the production, the exchange, the distribution and the use of wealth. Thus taught Political Economy unites its witness to that of Psychology, International Law and general Ethics in proof that human life is best lived when men have just regard for the rights and interests one of another, and when every man acts on the principle that he is his brother's keeper.

NORTH-CHINA COLLEGE.

TUNGCHOW (near Peking), January 1st, 1903.

里  
才